

中華郵政登記證為第一類新聞紙類  
官傳司登記證京誌字第三號

# 同聲



第四卷 第一號

求是月刊

每册國幣叁拾元

南京漢口路十九號發行

第一卷 第五號 目次

士與商	……	龍沐助
寄給青年的幾句話	……	黎國昌
青年與常識	……	紀果庵
外國人之日本精神文明觀	……	李長傳
由族內婚談到同姓不婚	……	王家吉
學書瑣語	……	鄭秉珊
關於黃季剛先生	……	武西山
氣候與人	……	陳企光譯
一個奮鬥成功的青年詩人	……	王振之

第一卷 第六號 目次

致中學生	……	紀果庵
知與行	……	許惕生
詞曲瑣話	……	葉夢雨
給現代青年	……	楊劍花
關於一渤海國志一	……	謝剛主
安南文學漫話	……	李長傳
中國畫的時代風格(一)	……	鄭秉珊
白奔山人事蹟及其全集	……	段無染
看忙樓詩話	……	嚴士弘
歌劇小言	……	紐曼原著 錢萬選譯
紅紙廊隨筆	……	李夢蓮
泉之渴慕	……	張葉舟
鄉戀	……	圭可
請客	……	王亞振
南北文壇印象略述	……	李荷山

同聲月刊第四卷第一號目錄

專著

春在堂藏碑紀事詩卷一

忍古樓詞話

詩詞


今詩苑

今詞林

李墨集三首 王君九一首 邵伯綱二首 趙幼梅二首 郭嘯麓二首  
溥心畬一首 陳伯冶一首 孫道始二首 沈任戡三首

俞階青六首 張孟劬一首 俞平伯六首 趙叔雍一首 鮑亞白二首

目錄



俞陛雲

夏映庵

同聲社采輯

同聲社采輯

637984

南京圖書館藏

駢散文

曹君直庶子出後為本生他庶母無服議書後

張爾田

汪先生行實匯編序

吳廷燮

雪映廬畫鑑序

李宣侗

宿縣陳勝井碑銘

張江裁

符離唐白文公祠堂記

張江裁

遺著

楊子日記 周作人跋

楊賓

蕁鄉詩鈔

張上鈺



# 春在堂藏碑紀事詩卷一

階青俞陸雲

## 序

昔年先王父治經之暇。喜習篆隸書。交游中詞章金石諸家。如譚仲脩、沈韻初、魏稼孫、吳伯英、周季貺、諸公。得兩漢以來。舊拓各碑。輒以相贈。若前漢之五鳳、甘泉、大吉、居攝壇、始建國、之石刻。後漢封龍山碑之章字未泐。華嶽廟殘碑之曼節等字尙存。武榮碑較近拓多七字。尹宙多十二字。衡方碑之太尉二字。史晨前碑之肅肅二字。後碑每行之末一字。孔宙碑之訓辭二字。皆未殘損。在同治初年。已稱舊拓。六朝以後諸碑。及新出土者。浩博無涯。收藏不多。亦有近時希見者。先王父藏諸茶香室篋中。晚年嘗詔雲曰。諸碑頗有佳拓。汝爲審理之。旋遭辛亥之變。海濱寄迹。至丙寅年。以修史事。移家故都。攜碑本相隨。因藏弄多年。稍有損盡。其中若石門頌、馮將軍碑、國山碑、石臺孝經、三體石經、紀泰山銘。拓紙過鉅。不易裝冊。乃取諸碑。紀以短篇。述其概略。各篇冠以先王父之標題。與先友之題識。次及舊拓之存字。爲近本所無。與殘石之存字無多者。亦鈎摹於後。撫親庭之手澤。懷舊雨之遺音。編爲春在堂藏碑紀略五卷。復取諸碑。各賦七言絕句一首。仿葉菊裳前輩藏書紀事詩之例。爲藏碑紀事詩。長言以詠歎之。思古幽情。與墨香相發。槐陰道暑。亦足自怡矣。甲申五月既望

。七十七叟俞陸雲識於故都之冬榮書屋。

### 夏禹王岫巖碑

摹本琅山翠墨精。異文閣帖待研評。至今神筆尊南紀。彈壓江河萬古聲。

碑在南嶽岫巖峯。相傳爲夏禹王書。乃海內石刻之最古者。作蝌斗文。舊有何一子摹刻。並音釋。余所藏者。爲崇川馮氏摹本。有釋文七十七字。徐宗幹題云。宋嘉定中。摹刻於嶽麓書院。馮君晏海。工篆隸。所臨岫巖碑。人稱神似。其弟爲刻石於琅山禹王廟中。宋太宗曾命供奉諸臣。鈎摹三代秦漢諸名蹟。爲淳化閣帖。首列禹王所書十二字。未詳其所本。字蹟與崇川馮氏摹本異也。

### 周石鼓文

陳倉移石始唐年。古刻長篇此最先。明本僅存三百字。殘文今更失汧鮮。

石鼓高二尺。廣尺餘。形似鼓而頂微圓。其一似臼。相傳爲周宣王獵鼓。秦漢以來。散棄於陳倉郊野中。至唐時。始徙鳳翔縣學。宋時徙汧京。以金嵌其字。靖康二年。金人輦至燕京。置於大興學。剔去其金。元時始移國學。今在北京國子監。此拓本。乃汪柳門丈官國子監祭酒時監拓。紙墨特精。有至元年潘迪音訓。其時存三百八十六字。明永樂年。僅餘二百七十八字。今則缺泐難辨。或存半體者。又九十餘字。道光時。張廷濟所見舊本。其第二鼓。泐毀氏鮮。四字未缺。今不可得矣。

### 周吳季子墓碑

聖筆題碑重杏壇。上邦列聘會衣冠。莫憑片壤悲吳季。羸博當年早達觀。

碑在江蘇丹陽縣。碑之中央。有古篆大字。舊傳爲孔子所書。吳季子墓碑。唐大歷十四年。潤州刺史蕭定。以夫子篆書墓碑。年久殘缺。重摹刻石。張仲申爲題記。刻於碑之下方。其左有唐貞元三年。楊伯豐題。及宋元祐三年。知潤州楊傑。請加封爵疏。其右有建中元年。程準楊憑等題名。宋太宗會縮臨其字。載淳化帖中。李陽冰工篆書。初師嶧山碑。及見季子墓碑。所學益進。可見篆體之古。在秦斯之上矣。

### 秦碣石頌

秦刻難從舊拓求。徐臨宋本出雙鉤。奚危柳趙親題識。篆法臣斯一脈留。

秦碣石頌。朱初內廷。藏有舊拓本。端拱二年。徐鉉奉勅臨摹。歷代未見著錄。至嘉慶年。孔昭孔在西安。見有持徐散騎臨本真蹟求售者。以索價昂。乃竭一日之力。鉤摹而還之。原本有柳文肅（貫）跋。趙文敏（孟頫）揭文安（奚斯）觀款。危學士（素）跋。文待詔（徵明）跋。以時促。未及錄出也。秦碑之傳於今者。惟泰山玉女池。及琅邪臺殘拓數十字而已。鐫山碑摹刻雖多。而無原拓。碣石頌。在宋初尙有石本。存字較多。特命徐鉉臨之。同治六年。楊沂孫見孔氏雙鉤本。詫爲希有。遂錢

版以廣其傳。今海內已無先秦片石。而此雙鈞本。以太史公遺落之文字。漢唐以來未經著錄之名篇。二百一十字。全文具在。徐散騎與秦相斯。一脈遙承。精神具足。洵奇蹟也。

### 秦嶧山碑

七處登封付劫塵。嶧山墓拓墨痕新。馮王幾滯留觀款。宋本元翻亦足珍。

余所藏嶧山碑。有三本。一爲先祖手剪成條。紙背皆編次序。殆欲裝池而未果者。二本爲先友所贈。上有標題云。秦相李斯嶧山碑。淳化四年刊。徐公鉉舉本。有子杓收藏印。及先祖昔年之日損益齋印。碑之末行旁。有馮敏昌、曹仲經、王相英、三觀款。皆小字正書。或元翻宋本時所增刻。後有宋鄭文寶題記。稍有損泐。當是舊拓。三本爲先伯祖在福甯郡齋所藏。首行維字已中斷。鄭文寶題記。字多缺損。不及第二本之所損無多也。秦始皇登封勒石之文。見於史記者。爲泰山、會稽、碣石、琅邪、東觀、芝罘、嶧山。自琅邪臺傾入海以後。今傳世者。惟嶧山摹本耳。

### 漢五鳳二年刻石

試從古隸溯秦年。書運千秋幾變遷。豈獨三公存篆勢。漢初五鳳已開先。

石方廣不及一尺。文曰。五鳳二年魯卅四年六月四日成。分三行。前二行四字。後一行五字。石漸剝泐。約略辨之。有沈樹鏞收藏印。翁覃溪論三公碑云。減篆之繁折。而爲隸之徑直。此之謂古隸。五



鳳二年之石刻。開其先矣。舊本三行字俱全。此拓本。第三行之成字已泐。金石記云。此西漢篆變爲隸之漸。十三字中。尙餘篆勢。渾成古樸。隸法之未經雕鑿者也。

#### 漢范功平治道碑

雁鐙錢范湖西京。石刻難求篆體精。殘字已如珍片玉。全文喜得范功平。

石刻凡二十九字。文曰。建平五年六月鄆五官掾范功平史石工般徒嬰本長廿五丈賈二萬五千。王氏復齋碑錄。稱爲范功平治道碑。漢隸字原。輿地碑記。皆載之。惟陶南村古刻叢鈔摹其字。此石未見拓本。當是從叢鈔中鈎取者。陶氏云。得之永康荒草中。蓋孝哀時所刻。西漢刻石。五鳳甘泉。僅存殘字。建昭年之雁足鐙銘。居攝年之泉范。乃金文而非石刻。今得此本。天下之漢隸文字莫先焉。

#### 漢甘泉山石刻

貞珉西漢本難求。江左幾無片碣留。驚喜儀徵賢太傅。射陽畫像合同收。

乾隆時。儀徵阮文達公。得殘石於揚州甘泉山惠照寺旁。石凡三段。一豎二橫。豎者。刻中殿第廿。橫者。一刻第百卅。一刻分四行。字不可識。甘泉爲漢厲王子分封之地。江鄭堂云。攷宋書樂志。有中殿宜王子之語。今石刻有中殿二字。當是厲王子遺殿之石。阮文達云。以厲王分封時攷之。在五鳳年之後。居攝之前也。西漢石刻無多。江左更不可得。遺蹟惟射陽畫像。今得此刻。雖殘文零落。可

與畫像同珍矣。

### 居攝壇壇二石刻

新朝法制喜紛更。官職無從證府卿。月落漸臺悲末路。餘他壇石尙留名。

二壇壇石。皆孺子嬰居攝二年所刻。高廣不盈尺。字分四行。一曰。上谷府卿居攝二年造。一曰。祝其卿墳壇居攝二年二月造。皆鑿石龕。而納石刻於中。上谷爲郡名。祝其爲縣名。其曰府卿。曰卿者。新莽時官名屢更。未審爲何官。其字體篆而非隸。與五年石刻之字殊矣。

### 居攝二年陶器

陶文深瘞土花濃。燧火江山一瞬空。篆體亦嗟隨國運。全非淳樸漢家風。

此爲最新出土之陶器。有居攝二年四字。完全無損。陳君仲恕。得之燕市。拓以見贈。孺子嬰居攝。僅丙寅丁卯二年。石刻傳世者。惟上谷墳壇二石。而字多剝泐。此器四字。完整無損。惟陶器非碑刻。因居攝年文字。爲希見之品。故附錄於壇石之後。其字體兼篆隸。細勁若鐵絲。非特與墳壇字迥異。且漢碑中無此字體也。

### 始建國萊子侯刻石

風霜飽歷棄山邊。何幸移蹤傍大賢。石倘能言應一笑。興亡親閱二千年。

嘉慶丙子年。顏孝廉逢甲。游郟縣臥虎山。拂石小憩。見其旁有石。在苔蘚蒙絡中。隱見字迹。攜婦洗剔之。字迹始現。文字雖剝蝕。而尙可辨。知爲新莽時。萊子侯刻石。乃告五經博士孟繼焯。移置孟廟中。并題記於石之右方。此石在空山中。歷二千年。雨淋日炙。而字迹猶存。見者謂其秀勁古茂。在居攝壇石之上。猶是西漢文字。可寶也。以出土較晚。嘉慶以前金石家。皆未著錄。拓本亦希。惟陸耀遹金石續編紀之。

#### 始建國鏡銘

閩庵（夏孫桐）早歲共詞林。茗理（章鈺）蘭交契素心。此日應劭傷並逝。墨痕爭與淚痕深。

新莽鏡銘。圓徑一尺五寸半。環分界道八層。銘詞在第三層。魏稼孫丈手拓。有稼孫所拓小印。並錄其銘詞曰。唯始建國二年新家遵詔書敕下品多恩賈人事禾命（周季貺釋爲樂）臍（譚仲脩釋爲躬）膏夫更作辟雍治校官五穀成熟天下安有知之士得蒙恩宜官秩葆子孫。又題記云。鏡爲詳符周季貺名星貽太守所藏。得自寶福局廢銅擔。已裂爲二。今以銀束之。章茗理題云。新莽鏡。爲仁和魏稼孫先生手拓。并詳加題記。極可珍異。上虞羅氏。新編鏡錄。所著錄有此品。脫釋多字。可據此校補也。此鏡銘。非石刻。因始建國紀年短促。金石文傳拓極少。鏡銘爲舊拓。不易得。且經譚周魏諸先輩審定。故附錄之。既裝成冊。夏閩庵前輩爲署端。章茗理同徵爲題後。兩君皆數十年老友。遺翰如新

。而故人長往。題詩掩卷。可勝依黯。

### 漢褒斜道石刻

急浪盤渦百丈深。上臨棧閣削千尋。摩崖字並江山壯。椽筆雄文冠古今。

漢明帝既開通褒斜道。命鄯君在褒城北。石門崖壁上。大書深刻。以紀其事。鄯君受詔興工。自永平六年。至九年四月始成。勒石處。橫廣一丈餘。縱處自三尺至五尺不等。字亦自三寸至五寸。參差不齊。瘦勁生動。因石勢連筆。純以天機行之。乃未加波法之漢隸。拓紙上。加以石裂之痕。滿紙若虬龍蟠舞。周秦石刻。皆爲後人摹刻。自石鼓文後。長篇文字。託石本以傳世者。磊落大書。與江山俱壯。莫古於此刻矣。

### 漢大吉摩崖字

幸遇名流手拓工。烟霞煥采越溪東。悠悠千載無人賞。兩度游山惜未逢。

此拓本。有鶴廬題漢大吉摩崖五字。又題。建初元年。在會稽跳山。大小二紙。退思二字一紙。又黃色牋。題跳山大吉碑五字。未署姓名。拓紙有二。一爲大吉二字。有非見齋校訂金石文字印。一較大吉字略小。凡二十字曰。兄弟六人。共買山地。建初元年。造此冢地。直三萬錢。後有丙寅正月。錫曾手拓。並魏錫曾印。一拓退思二大字。魏丈又題云。此二字。在大吉摩崖前數尺。當是宋元

人所刻。金石續編云。建初爲漢章帝元年。至道光初。凡一千七百四十八年。久歷風霜。字皆無損。至此始傳拓於世。越中金石記。但知有大吉二字。其兄弟買山二十字。則金石家從未收錄。今又多退思二字。丙寅爲同治三年。去道光二年未遠。等於初拓。又得先友題記。益可珍矣。雲曾於光緒丁亥春。侍 先祖遍游蘭亭禹穴。而未至跳山。（卽烏石山。岳武穆曾游之。）故 先祖紀游詩。有未尋大吉摩崖字句。其後又借許汲侯。往游會稽。亦未至此山。深致惜焉。

#### 漢王稚子闕

當年奉使過新都。遺闕先靈蹟已無。半石僅存王稚子。滄桑今復臥榛蕪。

拓紙之左。有吳丈伯鏜題云。漢兗州刺史雒陽令王稚子闕。在四川新都。有秣陵吳國俊藏金石書畫印。又魏丈稼孫題云。是刻近爲妄人重鑿。癡肥失真。此未鑿本。有錫曾收藏印。及古意二字小印。二石久失其下半。存者。高四尺五寸。廣一尺一寸。舊拓已殘缺。金石萃編錄其字。止存漢故兗州刺史雒陽八字。今拓本。以漢故二字。在石之上端。故無損蝕。兗州刺三字。尙可辨。其下盡泐矣。石闕有二。其先靈一闕。存半泐者二字。全者八字。文曰。先靈侍御河內組人王。共十字。明崇禎年。二闕已橫臥榛莽中。雍正年。先靈一闕。沒於水。僅存刺史一闕。黃小松云。幸洪趙二錄。載其全文。知稚子名煥。否則止存一闕。而陽字下。石已盡失。孰知爲稚子闕哉。余壬寅年入蜀。道出新都。使

車匆促。未及訪之。四十年來。屢經兵火。此闕恐又臥榛莽中矣。

### 漢祀三公山碑

祖庭校字筆親標。篆意還兼隸意饒。雅事承平難再得。訪碑都市紀先朝。

碑在元氏縣城外野坡。高四尺。廣三尺。篆書十行。其字體大小長短。每行參差不齊。沈韻初丈。以拓本持贈。題其側云。此舊時精拓本。新拓模糊。不可辨矣。同治乙丑。得於都門廠肆。有樹鏞校讀印。今觀其首行。元初四年之元字。尙有半筆。餘三字均全。碑文大半皆可辨識。洵爲精拓矣。黃小松得舊本。辨得一百九十字。題其後云。此碑篆體兼隸。古勁流麗。與嵩山之太室少室啓母廟三石闕。皆刻於元初四年。篆勢相同。一時風尙。亦關書連。翁覃溪云。此由篆入隸之漸。謂之古隸。集古金石二錄。皆載有隸書祀三公山碑。刻於光和四年。今碑已不存。此碑字爲篆體。且刻石在隸書碑之前。尤爲可貴。余藏此碑有二。爲同時所拓。故字之完缺皆同。均勝近本。其第二本。有先祖手校四行字。爲家藏各碑所僅見。敬錄於後。

第一行惟字上。是深字。

第三行奠字上。是徹字。周官小祝職云。贊徹贊奠。

碑以徹奠連文。本此。

第五行吉字下。是土字。

### 漢封龍山碑

孔宙華山早擅名。延熹劇蹟重西京。封龍晚出無多讓。章字猶存舊本精。

此碑題籤有二。其一有鄭齋校藏金石書籍印。其一有鶴廬印。先輩珍重標題。自是佳拓。碑刻於桓帝延熹七年。三公山碑。亦在元氏縣封龍山。刻於安帝元初四年。在封龍碑之先四十年。筆勢遒勁開展。與三公山碑。後先方美。諸金石家。載延熹元年鄭固碑。五年倉頡碑。六年淮源廟碑。七年孔宙碑。八年華嶽廟碑。此碑晚出。故未及著錄。鄭齋丈於署端之側。有題記云。銘詞中章字未泐。乃初出土時拓本也。

### 漢延光殘碑

穆陵灘水傍崇臺。懷古東坡載酒來。豈料憑闌襟袖底。漢碑咫尺瘞莓苔。

此碑拓本有二。其一有東武劉燕庭審定金石文字印。伯鏞收藏印。錫華印。紙背有朱筆書。漢延光殘碑諸城七字。其一有采牋正書。漢延光殘石五字。筆勢與石人題字。署端相同。無收藏印。而拓手紙墨。較劉氏藏本爲佳。皆爲舊拓。碑文分五行。可見者四十五字。與三公山碑。同時出土。筆勢相似。蓋亦古隸也。山左金石志云。其未行。延光四年六月卅日庚戌造。均可辨識。碑於康熙六十年。修超然臺。得自土中。已多泐蝕。此拓本。末行字亦尙可辨。臺在諸城。卽漢之膠西。蘇東坡作超然臺

記。西望穆陵。此俯瀕水。慨然想齊桓公淮陰侯之餘烈。不知延光漢刻。卽在其遊屐下也。

### 仙集留題

徐福盧敖去渺然。神山何處覓金仙。分明石室留丹竈。奇蹟無人訪洞天。

拓本清析。隸書分二行。漢安元年四月。八日會仙友。凡十一字。旁有正書。東漢仙集留題洞天八字。蓋後人所增書。孫退谷云。得於故侯家。書法甚妙。非漢人手筆不能。金石備攷云。石刻在四川簡州逍遙山石室中。今丹竈尙存。翁覃溪云。乃道家之詞。取備漢隸之一種。王蘭泉云。石質甚粗。故拓手不能工。今此本有魏錫曾收藏印。乃拓本之較精者。

### 漢三老碑

尊禮耆賢見古風。客星山畔訪遺蹤。感懷陳迹揚三老。寶華齋空一歎中。

碑有標題曰。三老碑。在餘姚客星山周氏。有周清泉手拓小印。春在堂詩編注中。有三老碑於咸豐年。在餘姚客星山出土之語。先祖未至餘姚。此殆周氏所贈也。碑分界畫四格。每格四行。每行六七字不等。第一格首行曰。三老諱通。字外口。二格首行曰。掾諱忽。字子儀。三格曰。伯子玄。四格曰。次子邯。餘皆書母氏及子女之忌日。有卒於建初十七年。及廿八年者。故知爲漢碑也。三老僅書二老。有名無姓。碑後有題刻三行。每行三十餘字。石已剝蝕。辨其文。乃首述三老之美德。末行冀子孫之克副祖德。字迹與碑文隸書同。蓋一人所書。漢時風俗淳厚。尊禮鄉老處士。碑陰列出錢人姓名。中有鄉老。必高一格書之。三老殆其流亞。以題刻中述三老之德。故稱三老碑。昔年故友端匋齋。曾以漢楊三老碑贈余。文字皆勝於此碑。其後所積古物。冠絕一時。華山碑舊拓。海內只有三本。悉歸於匋齋。乃於金陵節署。築寶華齋貯之。辛亥以後。家國滄桑。收藏盡散。楊三老碑。亦不復見矣。



## 忍古樓詞話

映庵

五代詞專集。存者惟馮延巳陽春集而已。章莊浣花集後。不附其詞。牛嶠有集三十卷。歌詩三卷。李珣有瓊瑤集。孫光憲有荆臺筆傭橘齋鞏湖諸集。和凝有紅葉稿。（宋史藝文志有紅葉編五卷）今皆不傳。宋史藝文志。又有李煜集十卷。集略十卷。詩一卷。成文幹詩集五卷。既不傳。亦無由知詞附集中否。故惟賴有花間尊前二選集矣。考花間爲後蜀趙崇祚所編。尊前則不詳編者姓名時代。以二集參對。除唐詞不論外。惟歐陽炯春光好蘋葉嫩一首。花間選作和凝詞。李珣西溪子金縷翠鈿浮動一首。花間前六句與尊前同。末作無語倚屏風。泣殘紅。與尊前異。又薛昭蘊謁金門一首。花間同。然則尊前所選。殆收花間不選之詞。其與花間複者。偶不經意耳。五代詞宋初尙易見。是亦尊前集爲宋初人所編之證。明萬歷嘉禾顧梧芳序。稱聯其所製。爲上下二卷。名曰尊前集。又稱素愛花間集。而余所編第有類焉。毛子晉重刻之。則謂尊前集本不傳。梧芳采錄多篇。釐爲二卷。仍其舊名。一若輯自顧氏之手者。殆顧氏竊宋編爲己有。而毛氏又爲顧氏欺也。

花間爲後蜀所編。既不列蜀主王衍孟昶。則不及南唐二主。自屬當然。無庸疑議。至其所選諸人。多屬於蜀。其不屬於蜀者。祇張泌和凝孫光憲三人。而孫光憲雖不仕於蜀。爲蜀之資州人。則不屬蜀者。實

僅二人。五代詞當以韋莊及南唐馮延巳爲最。既及南唐張泌。而遺馮延巳。未知何故。若謂其擇及人品。則和凝身仕四朝。豈能高於延巳。由斯言之。殆以詞之派別而有所去取也。余嘗謂五代詞當分二派。花間乃蜀派。南唐與之稍異。南唐二主詞稍流動。蜀派則務爲凝重。及於宋。二晏歐陽皆宗南唐。其爲蜀派者惟張子野一人。

花間所選。屬於蜀者。十三人。其間確爲蜀人者。祇閻選爲蜀布衣。毛熙震、蜀人。歐陽炯、蜀益州人。尹鶚、蜀成都人。李珣、蜀秀才。而李珣且本爲波斯人。此外。韋莊、杜陵人。牛嶠、牛希濟、隴西人。毛文錫、南陽人。若薛昭蘊、魏承班、顧夔、鹿虔扈。其爲何地人不可考。皆仕於蜀者。五代史所謂當唐之末。人士多欲依建以避亂。故其僭號。所用皆唐名臣世族。可證仕於蜀者。非必蜀人也。南唐則不然。二主、徐州人。馮延巳、彭城人。張泌、淮南人。陳幼文、江南人。（漁隱叢話引古今詩話云。江南成文幼爲大理卿。詞曲妙絕。歷代詩餘詞人姓氏錄作成幼文江南人。官大理卿。當卽據漁隱叢話。尊前集作成文幹。宋史藝文志。有成文幹詩集五卷。文幼當卽成文幹也。）其入選於尊前集者。皆江南人之屬於南唐者也。

屬於蜀者。又有歐陽彬。涪州人。仕前後蜀官至尙書左丞。竇江軍節度使。庾傳素。不知何地人。仕前蜀。累官至中書侍郎。後隨衍降後唐。授刺史。花間遺之。尊前入選。尊前又有劉侍讀、許岷、無考。

徐昌圖、莆田人。屬於南平。入宋。官殿中丞。林楚翹、歷代詩餘列於唐代。

金匱集。明正統海虞吳訥所編四朝名賢詞之一也。朱溫尹以宋吉州本歐陽文忠公集。刻於慶元二年。近體樂府校語。引尊前金匱諸集。陸放翁跋金匱集云。飛卿南鄉子八闋。語意工妙。殆可追配劉夢得竹枝。信一時傑作。定其爲宋人雜取花間集中溫韋諸家詞。各分宮調。以供歌唱。其意欲爲尊前之續。故菩薩蠻注云。五首已見尊前。南鄉子本歐陽炯作。放翁目爲溫詞。可見標題飛卿。由來已古。其言甚是。此集全錄自花間。惟排分宮調。爲可貴耳。

飛卿以薄於行而遭屏棄。兩唐書本傳皆言之。其不遇宜也。菩薩蠻詞。或傳係代令狐綯作。張皋文以感士不遇釋之。恐未必然。

唐詞初由詩變。所以渾厚。故學詞者必先知詩。乃能造詣上乘。飛卿深美閎約。神理超越。張皋文周止齋知其無迹象之中。字字連繫。得其篇法脈絡。持此法法花間諸詞之緒。庶不浮泛籠統。而亦悟南宋詞之過露鍼縷痕迹爲薄也。飛卿詩在晚唐亞於李義山。溫李齊名。而溫以詞勝。猶之道子善畫。惠之善塑。使溫果不能詩。或其詩不能亞於李。則亦必不能爲此詞也。

韋莊浣花集詩。止於近體。辭婉骨適。亦韓冬郎之亞。故其詞格高音亮。比之飛卿。稍趨流麗。以其菩薩蠻五闋。與飛卿菩薩蠻十四闋相較。飛卿多用縮筆。且章法銜接處。不易見。（飛卿十四闋。或非一

時所作。張皋文所評。亦有牽強處。一。端已五闕。則銜接甚明。皋文所評。亦極確切。一。篇法者。一闕中之脈絡也。章法者。數闕相連之脈絡。飛卿十四闕。皋文以章法言之。甚牽強。一。以篇法言。飛卿菩薩蠻小山重疊一闕。首二句言天曉睡醒。次二句言懶起梳妝。下四句則妝成著衣矣。自顧憐影。覩物思情。脈絡甚明。水精簾裏一闕。當如皋文所言。江上柳如烟以下。所敘爲夢境。至蕊黃無限以下三闕。則未必皆本入夢之情也。飛卿菩薩蠻詞。實有十五闕。其玉纖彈處一闕。花間未選。完全賦淚。可推知十四闕。非必一時之作。不當以章法言之也。

飛卿詞。實從六朝樂府出。不僅命意。遣辭亦然。句中絕少使用虛字。轉折處皆用實字挺接。故不見鈎勒之迹。唐時詞體。至飛卿始告大成。命意遣辭。在初創者不失爲新。經後人襲取。遂成陳舊。况夔笙謂花間至不易學。其弊也。襲其貌似。其中空空如也。此語誠然。然小令至高之境。厥在花間。謂其不易學誠是。若作小令。不知花間之妙處。終落下乘。蓋學者欲去貌襲之弊。欲其中不空無所有。須從六朝樂府及小品賦用功。且須能詩而後可。

飛卿詞造句新穎。而仍不現刻畫。若菩薩蠻之明鏡照新妝。鬢輕雙臉長。鬢輕者、髮稀。臉長者、面瘦也。深處麝烟長。臥時留薄妝。人多言曉妝殘。未曾道著卸妝後之所留也。飛卿更漏子云。梧桐樹。三更雨。不道離情正苦。一葉葉。一聲聲。空塔滴到明。南歌子云。手裏金鸚鵡。胸前繡鳳皇。偷眼暗形相。不如從嫁與。作鴛鴦。其詞流麗似此者極少。是爲南唐二主之所取法。五代詞流麗者。大都仍重在勒住。不然。便薄矣。

# 今詩苑

同聲社采輯

贈方拾珊

墨巢

刺天老幹鬱槎枒。隱現生平兩不誇。賣藥韓康真有道。解醫徐譽自成家。多能鄙事吾曾見。博施爲懷老更奢。莫與蓬萊量海水。眼前性命是黃花。

李蓀石女夫蕭伯逢求題羅月齋詩冊。感而賦此。

東坡莘老共論文。眼底黔州合有君。可似詞仙招白石。再逢佳壻誦微雲。新詩盡出吳中本。舊事多於日下聞。不惜八分勤寫與。勝教阿買醉紅裙。

默存見訪不遇。作此寄之。

疾風回雨小徘徊。折柬看花尙待催。過我未留脩竹賞。知君非爲海棠來。憂時豈必關春色。忍事終難到死灰。載酒諸生門外滿。草玄莫更斬深杯。

題王欣夫抱蜀廬校書圖

君九

王子嗜書真成癖。孜孜矻矻分陰惜。善藏善讀尤善校。風葉几塵掃最力。君家故居懸橋西。百宋一匱相咫尺。羹圃藏書富精刊。澗蕘借校號思適。太平盛事渺煙雲。藝林珍聞存載籍。惟君孟進逮前修。手握

丹鉛常終日。虛名抱蜀意何居。敢就管窺爲解釋。自古帝王致治平。端賴齊禮與道德。祭於五禮最鄭重。蜀爲祭器盛芬苾。聖人抱以致敬誠。小民自然胥感格。爲政之要在力行。文告空言初無益。抱蜀不言廟堂修。斯語衰世之藥石。君旣讀破萬卷書。獨傷焚坑禍將及。邪說誠行效左衽。初非好辨所能關。不如閉戶精潛修。晤對古人救禮失。此猶彥和夢宣尼。隨行禮器執丹漆。或云蜀乃獨之假。抱蜀慎獨其義一。管子斯言同魯論。恥躬不逮言不出。君慨文人多無行。衾影扞漏自怵惕。校書豈惟正書誤。日省其身。身在暗室。凡此兩義可並存。皆欲稱先則古昔。爲學實事求其是。漢宋門戶不容析。方今文衰道敝辰。大義微言將就佚。經師人師有曹褒。君游其門受埏埴。欲延正學一綫傳。惟禰考亭祖高密。校正羣書明人倫。聖經賢傳資羽翼。吾道庶幾其中興。日月重光燭火熄。

又

伯綱

霸齊曠古稱奇術。抱蜀人間噲不言。絕學隱承王戴後。鉤章棘句淪泉源。

繙根讎勘今誰替。經義紛綸孰似君。畢竟三吳成學藝。後生潘願待張軍。（謂潘景鄭願起潛）

爲巢章甫題海天樓讀書圖

幼梅

瞻天天已醉。望海海橫流。累卵難爲國。觀心尙此樓。相期勵松柏。所冀騁驂騑。力學吾儕事。浮名安用求。

祖德真能述。擬書此下帷。救時勵頑儒。勸學畜然疑。萬劫不可易。一燈應獨知。高歌風雨夜。未許感孤危。

又

嘯篴

地老天荒一短檠。撐胸萬卷兀嵒嶒。海雲如墨高樓夜。恐有魚龍聽誦聲。超遙宏景三層閣。睥睨元龍百尺樓。且可此間著巢父。一枝高攬白河秋。

又

心畬

尺素橫秋水。蒼然浦溆分。尙含千嶂雨。疑落萬峯雲。江上聞瑤瑟。岩前憶隱君。青猿聲斷續。應是隔溪聞。

重九前一日送次谿之官徐州

伯治

西園文宴久綢繆。一夕商飈動別愁。杖屨聲中移櫂去。茱萸香裏命車遊。填胸早蓄幽并氣。摩眼聊看汴泗流。猛士詩人今在否。可無此客著黃樓。

題東坡居士笠履圖

道始

北宋風流屬大蘇。亦仙亦佛亦名儒。憑將笠履傳千古。畫出先生野趣圖。豈獨文章不朽名。至今遺愛在彭城。八百年後我來日。笠履圖中拜老成。

爲張壽平題榆生院長畫竹

任戡

不盡凌雲氣。風雷破鬱森。摩天憑直節。落筆費沉吟。世亦猶西晉。人難醉竹林。惟將剛勁意。長守歲寒心。

夜坐

縷縷菸雲自吐吞。惟餘燈火共溫存。夜深傾盡魔瓶水。（日本稱熱水瓶曰魔瓶。）冷暖何曾著一言。

姊妹來京。贈予一冠。

破帽遮頭慣。塵埃已懶彈。猶能耐風雨。相伴度春寒。有妹來京國。千金易舊冠。最難塗炭裏。吉語說加官。

淮行紀事

渡江迎面卽風沙。土壁茅檐亦是家。勘合世間甘苦味。泥黃淮水六安茶。



## 今詞林

同聲社采輯

### 憶舊游

階青

問瑯梁歸燕。親見年時。月滿花穠。車騎雍容慣。正珠歌翠舞。錦幄千重。五陵幾多豪俠。回首感飄蓬。渾不信當初。鬱金堂畔。解珮相逢。匆匆。已陳迹。記大道青樓。曾駐花驄。綺夢如雲遠。又疲驢烏帽。殘照西風。黯黯黃塵影裏。誰倚舊籬櫳。臙頭白劉郎。芳桃忍說前度紅。

### 鷓鴣天 郊行

搖兀單車出禁城。西山濃翠馬頭迎。秧針刺水青於染。柳浪翻風綠漸成。招勝侶。趁新晴。前游山寺認題名。夕陽又轉譙樓鼓。催換年光是此聲。

### 南鄉子

秋色上征袍。野岸行吟慰寂寥。笛裏關山愁獨往。迢迢。海角寒雲帶雁高。郵柝轉深宵。夢渡松陵第幾橋。纔近鄉園驚又醒。蕭蕭。風捲蘆花夜長潮。

### 徵招 游靈谷寺。訪誌公道場。屢經興廢。僅小殿三楹。林陰憩坐。望鍾山孝陵。

空山黃葉蕭梁寺。遺蹤井闌憑弔。（寺與天監井闌題字。皆梁代遺跡。）春色自年年。又梅花開了。（

寺外梅花甚盛。樓臺新到眼。應不值高僧一笑。比鄰臺榭。皆寺中故址。佛火青寒。雲廊深鎖。鐘魚靜悄。舟載此重來。人何似。悠然鶴歸華表。王氣望鍾陵。只愁雲低繞。江山空百戰。歎帝業終銷荒草。更誰是絮酒芒鞋。哭西風幾照。

木蘭花慢 焦山登眺

簪仙姝螺髻。擁晴翠。立中流。看北固亭臺。南徐壁塢。今古悠悠。輕帆趁潮曉渡。倚松寥高閣對清秋。寂寞江山踞虎。蒼茫天地浮鷗。扁舟欲去還留。臨絕巘。俯滄洲。望東溟浩渺。鯨鯢蹴浪。海思雲愁。嚴疆更無戎索。任修羅戈戟亂神州。庾信暮年詞筆。哀吟豈獨江頭。

揚州慢

翠暖紅酣。丁歌甲舞。天街風日承平。逐五陵年少。簫鼓遍春城。正三月柳花吹處。脂香壓酒。銀脰調羹。任玉山頹醉。渾忘魚鱸深更。司勳重到。歷華鬢劫後心驚。踏舊院藤蘿。闌前月色。今爲誰明。曠有梨雲入夢。西風裏鈴佩輕盈。聚眉峯兩角。淒然多少幽情。

金縷曲 題王欣夫抱蜀廬校書圖

孟劬

好共吾廬占。似黃家當初佞宋。一燈懷槩。紅豆風流憑接席。錢顯石臞同伴。把蠶粉芸籤親散。掃盡楓窗多少葉。策書勛也抵參微管。文字福。幾人擅。承平樸學誰知羨。望南天卿雲下覆。輪囷萬卷。冢壁

而今皆殘毀。賴有青箱堪戀。歎我老目昏頭眩。喚起少年狂結習。夜無眠燒燭書堆案。藏山稿。待君勘。

菩薩蠻

平伯

好天良夜秋如水。明鏡一覺黃昏睡。睡醒見伊麼。更深夢也多。夜天都是雪。零亂成雙蝶。問院午陰遲。衾寒許枕知。

凭肩幾處同油壁。閒循荒沼低鬟立。風起又花殘。空憐玉臂寒。開年花事好。駝陌遊驄早。誰見復來時。綠陰紅滿枝。

菩薩蠻 清華園早春

橋頭盡日經行地。橋前便是東流水。初日翠連漪。溶溶去不回。春來依舊矣。春去知何似。花草總芳菲。空枝聞鳥啼。

雙調望江南

西湖憶。第一憶湖堦。孤嶼晴開樓閣豔。南屏翠合磬鐘寒。紅上玉闌船。清鏡裏。何地着從前。春水不知秋髮薄。家山且傍故人看。如夢也原難。

西湖憶。二憶憶山家。泉水新沾柴火氣。蠶塵初上味還差。開盞看春芽。明前細。可比雨前佳。龍井獅峯名色好。不如來啜本山茶。幾碗夕陽斜。

西瀾憶。三憶酒邊鷓。樓上酒招堤上柳。柳絲風約水明樓。風緊柳花稠。魚羹美。佳話昔年留。潑醋烹鮮全帶柄。乳蕈新翠不須油。芳指動纖柔。

被花惱 甲申五月後湖作

叔雍

鄰鄰嫩綠映鵝黃。芳思幾縈殘照。葦岸花洲放輕棹。鳧鷖狎暖。雲衣怯晚。劃破湖陰草。光景換。物華新。劇憐青鬢凌波老。回首天涯。撲浪沈山黛煙渺。鳴鑼初勒。鏡吹頻驚。露氣千秋杳。只汝南心緒。門紅裳。吟戲月梢頭鏡波皎。忍細數舊事南朝宮漏悄。

尉遲杯 江亭修禊。此樂不再。已五年矣。撫今追昔。不能無辭。

亞白

汀洲外。漸柳色作暝生新鷺。依依歲晚登臨。還惜名園歌罷。題襟往日。問幾個清游人在。願孤懷訴盡西風。等閒會負吟債。因思水曲塵香。長試酒湖船。墜夢猶待。倦墨愁縑俱非昔。况更是新亭淚灑。如今向滄波歌影。漫認逐春城花似海。儘高樓瘦笛偷聲。月斜仍戀眉黛。

天香

初癩蕪燈。層愁膩病。孤懷繡絳相倚。月自吹涼。笛還留韻。化作斷紅心字。繡屏六幅慵怎起。宵聽無寐。查盡秋千院落。依稀夜涼如水。幾回絳紈未試。漫相思粉零珠碎。祇恐鏡中鬢雪。煙鎖深翠。一別尊前顛顛。渾衰減年時舊風味。欲惜芳華。何堪夢醉。

曹君直庶子出後爲本生他庶母無服議書後

張爾田

爲人後者爲其父母期。經但言本生父母。而本生生母無文。案此當先以本服考之。本生生母之服定。而後本生他庶母始可以言。曹君據喪服總麻三月章。有庶子爲父後者爲其母。傳曰。何以總也。傳曰。與尊者一體。不敢服其私親也。因謂庶子出爲人後。與爲父後同。當服本生生母總麻。他庶母從總麻降一等無服。亦不敢服其私親之義也。曹君此議。本之謝奉曹處道。通典。晉穆帝昇平中。太宰武陵王所生母喪。表乞齊衰三年。詔聽依昔樂安王故事制大功九月。尙書謝奉議。禮。爲人後三年。必以尊服服之。庶子爲人後。爲其母服總。傳曰。何以總。與尊者爲體。不敢服其私親。太宰出後武陵。當依庶子爲後之例。服總而已。祠部郎曹處道云。禮。庶子爲父後。爲其母總。與尊者爲體。不敢伸恩於私親。爲人後以所後爲父。亦是尊者爲體。其所生俱是私親。爲父後及爲人後義不異。此二說皆謂爲人後卽同於爲父後。曹君謂其根據鄭義。攷喪服大功章。公之庶昆弟。大夫之庶子爲母。鄭君注云。公之庶昆弟則父卒也。大夫之庶子則父在也。其或爲母。謂妾子也。又云。從乎大夫而降。則父卒如國人也。賈疏。大夫尊少。身在降一等。身歿其庶子得伸如國人也。如國人者。謂同衆人。爲母齊衰三年也。故鄭於齊衰三年章注云。大夫之妻子。父在爲其母大功。則士之妻子爲母期矣。父卒則皆得伸也。賈疏申之曰。士父在已伸矣。但大夫妻子。父在大功者。父卒則與士皆得伸三年也。鄭君此注。雖無三年字。而總麻

章注則有之。彼注云。君卒。庶子爲母大功。大夫卒。庶子爲母三年。士雖在。庶子爲母。皆如衆人。賈疏并言大夫士之庶子者。欲見不承後者如此服。若承後則皆總。鄭義之見於經注者如此。然此皆指爲父後與不爲父後者所服言之。而爲人後則鄭義無見。又鄭駁五經異義云。喪服總麻章。庶子爲後。爲其母總。此義自天子下至大夫士同。不得三年。所言庶子爲後。雖未明指何後。觀其但引總麻章。則亦專就爲父後者而言。然則謝奉曹處道之說。實非鄭義。乃當時議禮者牽合鄭注之言也。（如博士孔恢議禮云。庶子爲父後者爲其母總。又云。公之庶昆弟。大夫之庶子。爲母九月。鄭云。君卒。子爲母大功。大夫卒。子爲母三年。經文則一。而鄭有二疑云云。與武陵出後情事迥異。是明明并爲人後與爲父後爲一談矣。雖引鄭注。實是牽合。又晉書禮志。哀帝母琅琊太妃周氏薨。帝欲服重。江彪啓。先王制禮。應在總服。詔欲降期。彪又啓。厭屈私情。所以上嚴祖考。於是制總麻三月。案哀帝由琅琊入繼。本生母喪。自當援爲人後者之例。而江氏乃引總麻章。蓋亦并爲父後於一談者。當時言禮者多如此。）以理而論。庶子出爲人後。爲其本生生母。於經本無正文。無已。姑卽大功章舉例。王侯庶子爲先君餘尊之所厭。不得過大功。大夫尊少。父卒則得伸。賈於大功章疏云。問者怪此等皆合重服期。今大功。故發問。所謂父在降一等也。父卒得伸。則容有從期得伸至三年者。若出爲人後。從三年降一等。當服期。如謂妾不得體君。不能與女君比。從期降一等。當仍大功。士無尊厭。父在時已伸矣。若出爲人後。亦

當由期降一等。則亦大功矣。爲父後者與父爲一體。本常無服。曾子問。古者天子練冠以燕居。鄭注。謂庶子王爲其母是也。故制爲總麻之服。不以降殺論。爲人後者。持重於大宗。以所後者爲其父。其於本生已降服矣。不敢服其私親之義自明。不必再降三降也。若如曹君說。大夫庶子爲本生生母降服總麻。父在已降一等。父卒又將何服。即使出爲人後。本生存歿可以不論。則亦只可施之於大夫士之庶子。父在與否。皆如衆人。亦將再降三降乎。況依鄭義。大夫父卒亦與士同。可謂進退皆無所據矣。然則昇平詔書制大功九月者。實出於不得已。固未爲失也。或曰。如此則本生他庶母宜何服。曰。此則經有明文矣。總麻三月章。士爲庶母。傳曰。何以總也。以名服也。若出後。從總麻降一等。則無服矣。大夫以上。爲庶母無服。更不待言。曹君謂本生他庶母無服是也。但不得以本生生母爲比耳。曹君禮服之學。爲晚近一大師。而斯言則似未晰。故書其後而辨之。

陳卓人句溪雜著。亦有爲人後者爲其本生生母服議。其文棧誤。似是未成之稿。有引證而無斷制。不知與予說同否也。孟劬自記。

#### 汪先生行實匯編序

吳廷燮

孔子曰。有殺身以成仁。毋求生以害仁。四書匯參。謂堯舜不傳其子。湯放桀。武王伐紂。皆爲參天地之化育。故凡非常之人。而欲建非常之事業者。必先有輕生之志。高世之識。出類拔萃之思。而後可以

冒大難。成大功。東莞張次溪先生。夙服膺師門汪氏之學。於汪公庚戌蒙難實錄、復國行實錄、行實續錄、年譜、著述年表。於一言一動。爲天下法則者。既已搜輯弘多。增光竹素。然猶慮有所罅漏。使盛德大業。有章顯。徒爲高山景行之想慕。於是不憚詳搜博討。必殫必究。得片辭微指。如禹鼎湯盤之珍。成且官鼓之重。又爲專書若干卷。所以餉遺後人者至矣。夫當前代之晚季。際天下之滔滔。莫不延頸企望改革。殆有甚于農夫釋耒。女工下機者。而汪公獨能糾合二三同志。爲博浪之謀。復大道之公。除世及之禍。斯真天下之所未有者。洎遜讓已行。又或遠征去國。蕭然樂道。不屑用世。迨至玄黃戰起。羣生罹劫。神州將沈。又應師錫之舉。以拯一世。其所以自處者。皆如佛氏所云不惜一身以救一國。此其道德爲何如。次溪審知其然。今得一地以行其志。作雙照教養院、秋晨堂。表明汪公受聖善之教。廣成人之德。以堯舜不私其親爲法。而必爲天下得人。以孟子言已飢已溺爲主。而必以兼善天下。比戶可封。熙熙皞皞。其視漢唐以後之措置。蓋有不可同年而語者。昔張良發憤於博浪而不能損嬴氏之絲毫。其時又無人表章偉烈。爲之大其事以銘其功。今汪公有次溪以光所著述。垂之萬世。則又汪公之德有以致之。變深幸汪公之遇。又幸後之牧民者有所師表焉。敬爲之書。中華民國三十三年五月。江甯吳廷燮謹序。



夫烏兔電邁。天地瀰空。夢影前塵。彈百劫於指上。烟雲寸卷。縮萬象於腕間。澄月雖虛。駐之以夢寐。逝波不返。常留乎畫圖。此秉之孫君所以有雪映廬畫鑑之作也。君當湖世家。江東名士。軼冀北之羣。華年方富。染雲林之墨。六法偏工。爰自家巷優遊。勝區閱歷。廣徵名輩。流爲丹青。乃若玄墓銅坑。諸山。秀壓具區。名標香海。瑤雪點岫。卽海南之嬌雲。縞袂扣門。勝羅浮之夜月。一鶴導夢。萬花孕春。則爲圖曰鄧尉探梅。先德步升公。手輯漢魏二十一家易注。君乃研朱細勘。據案動讎。徵易傳於京房。歸魂屢筮。稽易禮於虞氏。消息頻參。風雨一窗。丹黃五夜。則爲圖曰祖庭讀易。一川魚鳥。爭逐扁舟。十里管絃。言趨舊社。到門而遍尋父老。曝背而共話先聞。同姓之誼斯敦。斜上之譜聿著。則爲圖曰扁舟訪族。半江水綠。一穗燈青。寶軸摩挲。仙雲供養。據清河之畫舫。錄瓜田之舊聞。古魂窺樞。夜虹貫月。則爲圖曰翦淞校傳。湖山勝賞。言數西泠。尋鷗路以入花。聽魚噴以越竹。南高北高。共俯奩鏡。裏湖外湖。淡隔虹隄。澄波風定。不動垂綸。濠梁魚樂。相忘此水。則爲圖曰西泠垂釣。閒居奉母。藝南陵之蘭。秋色延年。薦鄖潭之菊。楚國之斑衣屢舞。黃門之板輿輕安。愛日舒長。慈竹永好。則爲圖曰北堂薦菊。江水滔滔。晴川歷歷。高風漢陽之渡。初日翼際之山。清水濯纓。泥痕未澆。明珠解佩。游女可思。則爲圖曰漢泉待渡。胄承通德。家有賜書。五千卷之撐腸。三萬軸之插架。嬾龍夜守。偏於福地之居。靈芸晝薰。不畫羽陵之簡。牽四民之月令。當七夕以曬經。則爲圖曰南軒曝書。望

林際之春申。對樓頭之畫友。古歡舊雨。共此素心。十日一石。每竟清晷。歲月之聚。偏速於轉颿。金石之交。忽隕如落葉。則爲圖曰江樓畫石。先代桂山先生。琢刻特長。神技久著。刀筆游其藝。石墨鐫其華。發研若新。通解牛之術。成裘不易。貴集狐之方。君乃求索人間。譜爲一集。則爲圖曰徵章譜印。清流九派。成此畫境。珠樓一角。宛在中央。當夫白蓮送香。碧柳未禿。秋霄如海。遲妍月於蓬壺。涼露滿湖。比清景於鴛水。則爲圖曰東湖遲月。砧崖雷吼。答虬龍之濤。迴峯翠寒。偃麒麟之影。雪幹千尺。黛色萬齡。有歛嶽之靈奇。實東南之殊勝。則爲圖曰黃山觀松。約其前蹤。都爲此冊。宣導幽墨。陶寫靈襟。永存神明之笈。豈取耳目之翫。抑君先德明僉憲峯溪公。有雲山履歷圖五十四幀。流風遠溯。逸事重追。將以鄭重逝陰。綢繆晚節。千秋可接。比弇州紀行卷之圖。平生是說。卽公垂追昔遊之集。甲申驚蟄。閩縣李宜侗。

宿縣陳勝井碑銘

張江裁

漢書陳勝傳。莊賈殺勝。葬碭。高祖爲置守塚。水經注。穀水東逕安山北。卽碭北山。有陳勝墓。予以民國三十三年一月。巡視宿縣西北村集。知疇山西麓又有陳勝塚。豈其後人復在故鄉立塚以永慕之歟。五月。予出巡縣南距城四十里之小劉村。有涉故臺。已傾圮。相傳爲篝火狐鳴處。東有井一區。井闌斷裂。罅縫縱橫。殆千年前物。汲之氣脈充溢。味冽如泉。問之故老。則羣稱爲勝起兵時所鑿以飲士卒者。

。予念勝之功烈。所潤澤於後來。猶如昨日。而遺蹟漠然。深用慨息。爰斥俸濬治。繚以短垣。樹碑曰陳勝井。父老請刻石以紀。予曰。噫。勝爲隱王。乃豪傑千載之人。而非一世之人也。方秦之強。宰制天下。苟與拒抵。立取族滅。勝則揭竿而起。義聲震盪。如決懸崖注千丈之溪。傾倒委瀉。億兆瀕死之民。乃緣之而脫虐政。懿歟鑠哉。自有革命以來所未有也。或以勝中道摧沮。未能覲揚大業。遂謂去劉項遠甚。不知成敗由天。未可以是論人。使當時無勝。不特無以拯民於塗炭。積威之下。雖劉項亦何能繼起。由是言之。勝之功烈。與歷史永永無極。卽一井之興廢。有足以繫人心。隆觀聽。而不容磨滅者。夫何狃於成敗之見乎。因爲銘曰。

赫赫隱王。順天革命。誕育符離。天挺剛勁。義旗首舉。導項啓劉。蹉跎未遂。臺址長留。曠山之麓。天高日曜。英風颯然。如見騰越。茫茫此井。王實開之。弗濬斯竭。何以恢之。汲飲有資。自今毋替。讓辭勒銘。敬詔來禩。

符離唐白文公祠堂記

張江裁

夫辭能行遠。不朽者聲聞。道以得民。不祧者俎豆。風徽照世。椒蘭愈芳。志節邁倫。羹牆如見。是以廣川雖逝。猶傳下馬之陵。高密云亡。尙表通德之里。興言尸祝。靡間古今。固無關桑海之變遷。雲仍之絕續也。符離古渡之旁。有地一區。廣才半畝。唐白文公樂天故居在焉。癸未中冬。余與縣人王叟雪

漁張君惠三訪厥遺址。謀所以修祀事存名蹟。越旬經始。爲屋三楹。永奉公像於中。題曰唐白文公祠。訪得公二十四世孫口口。俾司鐫除。世世弗替。復就餘址。附設雙照教養院。以養貧寒子弟。擇遺裔之尤秀異者。令免費就學。恢恢乎包舉崇報之典。有非一端可盡者。繼考縣志。知杜少陵韓昌黎二公亦嘗客游茲邑。爰增關饗堂。並隆胙饗。縣一代名賢之祀。申千秋仰止之思。前喁後于。同垂於竹帛。左提右挈。如叶乎瓊篲。九原有知。差足慰已。或謂公本居太原。後徙下邳。貞元中擢官集賢校理。召入翰林爲學士。則居長安較久。東都履道之里。聊以容身。香山八節之灘。于焉濯足。其居處之可考者如是。至符離下邑。特弟若妹權寓之所。一塵姑受。詎比先疇。三宿遂行。原同過客。而視爲邦族。儻諸鄉賢。奉香火於廢墟。靳真靈之來格。得無傳會滋惑。好事遺譏乎。不知空桑增戀。有樂乎留連。流人足傳。何分於久暫。刻舟求劍。固哉斯言。夫以公名業文章。照耀千古。乘雲馭氣。何所不之。而況鄉心惻愴。致慨阻飢。別業荒蕪。興嗟晚歲。徵諸本集。其蹤跡有關者。又班班若是。然則余之祀公。與宿之人所以樂贊厥成者。夫何疑焉。祠始於癸未冬十二月。至明年春二月訖工。收買民屋。凡費金口萬口千口。張君惠三任之。版築之費若干金。出之紳士捐輸。其贊畫贊惠。俾底於成者。則王翁雪漁也。例得備書。中華民國三十三年歲次甲申春二月。淮海省第三區行政督察專員東莞後學張江裁謹撰於符離官廡。

楊子日記丁亥

山陰楊 賓大瓢

康熙四十六年丁亥正月壬寅初一日乙卯陰暖。午後漸涼。平明拜

天地。又遙拜 祖 父像。王經子張仁符陳亦韓王鈞萬王源長李斐莖先後來。報之。并過主人。不面。

李業公亦以疾不來。主人命斐莖報謝。同彥來若宿熙文游東園。見玉蘭花。竹笋亦如人長。還得壁十五號平安報。報續家婦金于歸。收玄狐帽。誌公履。青豆。又得朱誠齋書。增年譜。夜置酒。會彥來若宿熙文飲。更餘乃罷。

正月初二日丙辰 立春。受寒。服煨薑湯。靜坐久之。汗。乃稍稍愈。招陳亦韓王經子王源長王鈞萬李斐莖張仁符飲。翁康館報章至。得水坑小硯。及玉版十三行。楊子跋。以端石刻其後。書本不如意。又鈎法戈法。刻工皆用董法刻之。更形其醜。夜夢譚書。兩許不棄。

初三日丁巳 陰晴相錯。增年譜。閱武夷山紀要。試新硯。疾未愈。又服薑湯。夜會彥來小飲翠竹山房。破腹。

初四日戊午 陰晴相錯。增年譜竟。閱武夷山紀要。山在建甯府之崇安縣。週一百二十里。中有水九曲。盤繞三十六峯之間。仙舟架壑者七。仙峴貯匣者十六。相傳彭祖二子曰武曰夷者居此。故名。秦

時魏王子篤張滿等十三仙遺跡。則在一曲之大王峯復古洞。三曲之小藏峯。四曲之天柱峯。武夷君宴鄉人之遺跡。則在一曲之幔亭會真廟。其後朱子之隱屏精舍仁智堂石門塢觀善齋寒棲館晚對亭鐵笛亭茶壺釣磯。則在五曲之大隱屏下。宋道士劉碧雲輩棲真之所。則在六曲之天遊峯。天遊武夷最佳處也。白玉蟾遺跡。則在一曲之止止菴。主人命裴公招飲湛恩堂。觀劇。因聞主人病甚。不盡歡而罷。

正月初五日己未晴。傷風。嗽不止。召陶天一診脈。服藥。戲書百字視主人。不得見而還。爲陳亦韓書條幅。過亦韓。遇張仁符自琉球館來。出小方紙十四張相贈。仁符曰。見其副使正議大夫程順則。自言其先中國人。明太祖命往琉球國。教中山王子弟。今子孫遂爲中山人。按會典。琉球國有三王。曰中山王。曰山南王。曰山北王。洪武初。中山王察度。山南王承察度。山北王帕尼芝。皆遣使入貢。十六年。各賜鍍金銀印。二十五年。中山王遣子姪入國學。因賜操舟閩人三十六姓。順則或卽其苗裔而託名于教授耶。

正月初六日庚申晴。視主人疾。不能起。以後事見委。執楊子手。若永訣者。因痛哭。楊子亦哭。又欲

楊子次撫閩政蹟入止止菴自記。楊子允之。歸而起草。夜服藥微汗。

初七日辛酉晴。爲主人草遺疏。清案牘。食不下咽。夜服藥破腹。

初八日壬戌晴風。爲主人檢點進呈骨董。主人稍進藥石。似有生機。爲人書。

初九日癸亥晴。爲主人撥入書院銀六百餘兩。米七百餘石。校柳邊紀略。存款四。

初十日甲子晴。書夢虎樓廟堂碑。及藏真聖母帖跋。爲主人撥糧道無礙銀四百五十兩。交福州府。置

共學書院義田二頃。校柳邊紀略竟。市相思木筆筒二套。相思木者閩產也。文理與花梨同而色黃白。土人染色爲器。以假花梨。而直則甚賤。夜閱府君塞外稿。

正月十一日乙丑陰晴相錯。家庭紀述一。朱誠哉至自蘇州。得璧十六號稟。同誠哉過主人。及王李諸君。視主人病。還。以錢穀號交誠齋。聞琮于十一月十一日得一子。是日右臂復痛。

十二日丙寅晴。爲王經千及熙文書箋。臂痛。書不稱意。見唐臣雅書李輔光碑。屬誠哉鈔出塞詩。附柳邊紀略後。陪誠哉宴端靜堂。勸主人禁撞神及迎臺閣故事。貼神應膏于右臂。

十三日丁卯晴。爲王經千作小楷百六十字。又爲熙文書。邸抄報沈青臣卓異。申含吉附薦。夜月色甚佳。聞鼓吹花爆聲。與誠哉談坐功。誠哉曰。上海嚴伊旦者吾師也。初學時。有神來爲我撫摩。四肢百骸能自動。一月後氣血流通。乃靜坐收放心。

十四日戊辰晴。爲王經千書小行狎二百四十字。又爲陳亦韓書條幅。閱日下舊聞內石鼓考。始知連江石鼓文。乃楊用修贋作。因作連江石鼓文後跋。

正月十五日己巳晴。爲王經手作小楷百三十字。作北監連江石鼓文合帖跋。率同人視主人病。夜酌同人於翠竹山房。放花爆。臂痛。

十六日庚午晴。爲王經手作小楷百二十字。計書冊已八葉矣。又爲王源長書小匾六。爲主人草告病疏稿。夜閱左傳。

十七日辛未晴。風。課小楷百二十字。行狎百字。主人遣葉公贈銀二百兩。若將永訣之爲者。楊子涕泣而受之。夜閱左傳事緯。是日主人命斐莖于滌恩堂開印。權也。

十八日壬申晴。風。課小楷百二十字。臨聖教序六十字。視主人病于榻前。諄諄以遣人進書籍骨董爲言。蓋不藥不食者十七日矣。還閱林登州集。林登州者。名唐臣。字元凱。洪武中。官止登州太守。故以名其集。其詩近唐人。七古尤佳。文則學唐宋大家而未純。然持論甚正。蓋漳州之錚錚者也。其後人撫標遊擊與重錢之。有主人序。主人命葉公攜水晶墨晶眼鏡四函。聽楊子擇其宜者。初楊子欲購水晶眼鏡。主人以爲晶產漳浦。遣使持書及金。屬漳浦令陳汝咸購之。汝咸返其金。自購數函授使者。使者至中途。爲盜所奪。至是汝咸知之。復購以進。故有是命。楊子目試之而各留其一。見未央宮東閣瓦硯。存疑一。夜閱左傳事緯。夢鱸耕。是日發主人病本。

正月十九日癸酉晴。課小楷八十字。爲熙文書冊葉。勸主人致同城僚屬別敬。脾泄。召陶天一診脈。夜



閱左傳事緯。夢鑿耕。

二十日申戌晴。爲人書。楊子書貴遲不貴疾。每晨僅作小楷百。或許後再作。亦不過百。今案書者多不能盡應矣。主人餽臺灣西瓜。服藥。夜閱左傳事緯。

正月二十一日乙亥晴。爲李斐莖書冊葉。主人餽山楂及梨。服藥。夜閱左傳事緯。

二十二日丙子陰。微雨。爲人楷書。陳亦韓至自泉州。言福興民多飢。頗有咎中丞匿荒者。楊子曰。去秋十餘縣災不報。中丞雖主之甚堅。然楊子爭而不力。蓋亦與有罪焉。夜閱史記。是日作書。始用虛頓之法。

二十三日丁丑陰。午後微雨。爲人書。過陳亦韓。夜閱史記。

二十四日戊寅陰。微雨。黎明斐莖來。言主人將易簀。卽另草遺本。急往視之。已不能言矣。午時卒。率同人哭其寢。召屬吏送王命勅印貯市政司庫。夜不成寐。

二十五日己卯陰。經理主人入殮成服事。喪主送帛。夜送主人殮。不寐。

正月二十六日庚辰晴。司喪。作寄不列號家報。是日爲孝孫李業公成服。率同人焚冥儀。夜不成寐。

二十七日辛巳陰。司喪。定主人進古董議。初主人病篤。遺命進古董。卒後諸君頗有異議。楊子以爲大臣遺疏進古董。創也。然諄諄以此見屬。微特子若孫不敢背。僕亦烏忍背之。惟有馳至江蘇。商

之李松客及扈從諸公而行。庶乎其可。諸君不能難。議遂決。

二十八日壬午 微雨。先是主人疾亟。楊子屬裴公傳神。裴公曰。先世見隣婦剪畫像作鞋樣。以爲子孫不孝而徵。勢必舉而棄之。是以世不畫像。今畫則背祖命矣。烏乎可。楊子曰。此憤激之詞。卽喪欲速朽之謂也。如子若孫。果能守而奉之。不至剪爲鞋樣。未必非令祖之所喜也。且閩人德令祖者多。萬一來請畫像留于祠堂。則何以應之。裴公意未決。而寫生者輒私寫一像。至是以進。裴公遂留之。

正月二十九日癸未 微雨。書共學書院碑記。而召倪遴友書其陰。遺朱若宿姜熙文先歸。裝國學連江石鼓文合帖成。

二月癸卯初一日甲申 微雨。布政使高鏡庭貽我翻刻聖教序。運使傅帖亭作楫來。書碑記。夜作三十一號家報。封銀二百兩。

初二日乙酉 晴。躁熱。按察使金長源培生來投刺。書碑記竟。都統李華來。聞 天子于正月十九日南巡。

初三日丙戌 晴。躁熱。見高鏡庭宋揚聖教序。同彥來鏡輪公祭李中丞。孝孫致帛。倪遴友書碑陰竟。得楚濟書。及壁十七十八號稟。歸中丞書籍。

初四日丁亥雨。李斐楚押古董赴行在。以銀書空歸。傅帖亭來談。久之乃去。焚廢紙。作寄李松客書。

二月初五日戊子晴。爲人書。將軍標副將朱杰來。初倪遴友失館。楊子屬都統李華薦之固山大劉某。某未及應。而杰請之。杰楊子同鄉也。至是來告。主人從弟武安來求書。存疑二。纂過眼錄一札楊浴菴。得報。浴菴名日升。字允大。侯官丁未進士。李中丞延主共學書院者也。其子名侃。字晉爲。初六日己丑晴。午後雨。共學書院師生迎李中丞木主入書院。夜閱各法帖題跋。作靜海高氏聖教序跋。

初七日庚寅陰晴相錯。陪金長源祭李中丞。作小楷二百字。楊晉爲率書院生何民起言來見。初楊子聞民起貧而能文。言于糧道張鈞庭孟球。福州知府周希堯元勳。爲之入泮。至是來謝。得壁十九號報。及河車丸。藍公濬來。關人辭焉。作札寄之。并以二石索鐫。借閩人曾惟闇垣燦舫窗隨筆閱之。增補新例總目。

二月初八日辛卯晴。書高氏聖教序跋。得舊拓禮泉銘。臨二百字。作小楷百字。增補新案總目。市土物。巡捕官黃樸菴子圻餽閩薑橘餅武夷茶。樸菴。楊子同里也。

初九日壬辰晴。作小楷百字。高鏡庭來。以聖教序跋示之。增補新案總目。楊晉爲來。李文侯華遣使

示其進呈骨董。見董玄宰綾字一幅。真仙筆也。蓋生平所見董書第一云。屬朱鏡輪鈔舛窗隨筆。

初十日癸巳晴。風寒。午後陰。增補新案總目。作小楷二百字。于彥來所見王阮亭秦蜀驛程後記。信歸閱之。采入金石剩語二事。書要一事。日富續編三事。臺灣新調經歷張爾介天銓來。楊子同鄉也。斐公餽滿洲餽餽。

十一日甲午陰。作小楷八十字。晤藩臬諸公。福清何應梅來。應梅字民觀。李中丞觀風拔取儒童也。韶秀能文能詩能書。因授以筆法。贈以玉版十三行俞氏宣示黃庭三帖。彥來留之飲。楊子陪焉。楊浴菴札示鄒流綺明季遺聞。報之。并歸其舫臆隨筆。夜閱明季遺聞李賊倡亂本末。

二月十二日乙未晴。書贈黃樸菴何民觀扇。閱明季遺聞弘光本末。召楊晉爲來。與斐公商行期。

十三日丙申晴。書贈黃樸庵條幅。張爾介餽紗緞鞞帽。見東書堂法帖。在寶賢堂遵訓閣下。閱明季遺聞隆武永歷本末。臨醴泉銘百二十字。與高鏡庭閒話。

十四日丁酉晴。書北歐連江石鼓文合帖跋。又書扇贈完璞。完璞鏡輪新字也。閱弇州書跋。及懷素聖母藏真帖。是日撫標將卒迎李中丞木主入歷任巡撫祠堂。

二月十五日戊戌晴。作小行楷各百字。楊晉爲來。代共學書院生會則與文臺陳師顏卓何民起求書。李松客札至自揚州。歸着爲明季遺聞。爲則與書。

十六日己亥晴。爲陳師顏何民起書箋。又書扇贈楊晉爲。頃之。民起師顏來觀法帖。晤司道諸公。

十七日庚子晴。臬藩兩公先後來。晤福州府太守周希堯元勳。以共學書院事宜列單與之。李文侯亦至。

。千一書至自晉江。報之。楊晉爲札問希堯語。報之。頃之。晉爲及陳師顏以聖教序贖本。文待詔書畫。趙承旨鄭少谷書屬觀。少谷名善夫。明末閩人。書有筆法。得聖教意。楊子以府君圖屬題。

。并以家傳示之。再跋玉版十三行。彥來贈我緞鞵。晤前福清縣令潘樹柟。

十八日辛丑晴。作小楷百字。陪李文侯高鏡庭傅帖亭閒話。戲書行狎二百字。王經千招陪羅源令蔡

彬小飲。是日得帖亭傳一方云。飢後凝神徐行三百六十大步。則終身無足疾。

二月十九日壬寅晴。陪高金兩公閒話。鏡庭又贈聖教序二本。裝日課行楷爲二冊。又裝鏡庭初贈聖教序

。又市舊揚九成宮一本。楊晉爲來。以日課行狎四紙與之。較對高氏聖教序。

二十日癸卯晴。作小楷百五十字。作家藏及王經千高氏聖教序跋。戲書行狎一紙。與李中丞止弔家祭

。夜作完璞斷本聖教跋。

二十一日甲辰晴。陪高傅兩公閒話。楊晉爲封藍公濬札及印章至。公濬思附楊子舟入浙。楊子兩報之

。書家藏高氏聖教及完璞聖教跋。夜閱韓文備法。

二十二日乙巳晴。金長源以示稿相商。報之。高鏡庭傅帖亭來。不值。過楊浴菴楊晉爲許伯調林洙雲

。皆不值。又過蕩水莊。尋林同人。同人已瞽。扶杖出見。時年七十有一矣。洙雲亦會。同之過藍公漪。又獨過共學書院。晤浴菴父子及諸生。遇王經千。同之謁長源帖亭及張鈞庭。皆不面。又同過鏡庭署齋。晤其幕客張元發。留飲。觀聖教序六種。內宋搨一。明初搨一。餘皆舊搨贋本也。又宋搨米臨蘭亭一。舊拓蘭亭一。鼎帖二十卷。與鏡庭縱論金石之文。而經千則與元發論堪輿。至暮。借宋搨聖教。燒燭閱之。是日伯調札至。

二月二十三日丙午晴。作札報許伯調。赴藍公漪之招。與林同人痛談甚樂。午後同林洙雲公漪遊烏石山范忠貞公祠。薄暮還。遇何民觀楊汝昂于門。民觀貽我書扇。傅帖亭葉宗竹各招飲。辭。宗竹名方苞。汝昂名軒。皆中丞所取士也。夜閱宋搨聖教序。

二十四日丁未晴。跋玉版十三行帖。同定武蘭亭敘。贈林同人。過裝潢家梁允靜。觀故家殘帖。擇其數種。中有三雅齋蘭亭。并贈同人。許伯調招同同人藍公漪林洙雲陳廷漢飲紫藤花菴。出敗帖觀之。取蔡京朝元閣三大字。又與同人縱談邊塞。以柳邊紀略示之。索公漪畫扇。廷漢名學良。善畫能詩。伯調表弟也。伯調言其祖平遠先生彞。明末督學浙江。實府君之師也。因重敘世誼。薄暮還。是日張鈞庭來答拜。不面。

二月二十五日戊申晴。書扇贈林洙雲許伯調。借洙雲盧龍塞略。高鏡庭楊晉爲陳師顏郭威子先後來。同

彥來經千赴葉宗竹飲。同席者葉繼泰楊晉爲。又同彥來經千宗竹過何民觀。還。爲人書。夜閱盧龍塞略。盧龍塞略者。閩人郭汝承刪其父郭海嶽造卿之書也。自洪武初迄萬曆庚戌。凡十六門。二十卷。

二十六日巳酉晴。暖。服夾紗。書贈陳廷漢扇紙。又爲林洙雲書冊頁。楊浴菴招飲。辭。過洙雲。歸其盧龍塞略。又過許伯調。會藍公濬。尋林草臣。草臣名偉。時年八十有二。又同過廷漢東圃書堂。遇其表弟黃于莘。及伯調共飲。爲人書。薄暮還。是日李文侯送席。楊汝昂招飲。不赴。

二月二十七日庚戌晴。熱。爲人書。又書綾題李中丞靈几曰。立身以孝弟爲本。行政在寬猛之間。楊晉爲陳師顏來送札。贈林洙雲王審知碑。藍公濬聯扇。俱得報。高鏡庭餽土物四種。假許伯調斷後聖教序。束裝。得漳州陀羅經。翻刻化度寺碑。茶錄。麻姑記。朱敬益心經。佛遺教經。裝九成宮七十二賢像成。夜。裴公餽贖八十兩。

二十八日辛亥晴。風。束裝。李文侯來。聞高鏡庭護巡撫印。同王經千卽往道喜。并拜文侯。還。贈李裴公大瓢日課冊葉一本。端硯一方。陳師顏來送。餽土物二種。楊浴菴餽土物四種。傅帖亭餽哆囉呢一身。銀爵一對。是日王源長率十九舟先去。

二月二十九日壬子陰。朱杰李文侯楊浴菴許伯調林洙雲葉宗竹郭威予楊晉爲先後來送。先是楊子欲爲

李中丞入名宦祠。商于晉爲伯調。人情雖極踴躍。而費無所出。楊子勸李裴公助銀四十兩。至是令裴公拜求洛菴伯調洙雲。而同王經千致費。諸君受而去。遂同完璞先至洪山橋登舟。同完璞上洪山。又度洪山橋。橋長二百餘步。列洞三十有四。上覆以屋。碑之者云。水由螺江馬瀆循岳山而下。匯流于此。橋西爲妙峯山。未及登。是日金長源餽二十四兩。朱杰 餽武夷茶一錫。晶章二方。三十日癸丑晴。舟泊洪山橋。張鈞庭餽暉岐緞二身。銀爵一對。金長源遣使送茶。楊晉爲陳師顏來談。飯而去。藍公濬札索題畫。爲書一截句。聞王源長十九舟以篙師帶鹽。爲鹽使者巡役所阻。止于竹筒。

三月甲辰初一日甲寅晴。熱。藍公濬來。附舟。有高斯億者。亡友雲客之子。以書名于福州。見楊子書。爽然自失。凡楊子片紙隻字。皆收而藏之。無因緣相見。皇皇者數日。至是公濬爲之言。乃晤于洪山橋之真武廟。痛談竟日。因以筆法授之。贈以王審知碑搗。公濬之子貞木侍坐。亦得筆法而去。是日舟中搜鹽三次。先行各舟亦退回洪山。

初二日乙卯晴。躁熱。黎明同彥來入城。陪李裴公隨中丞靈輜出城。復登舟。許伯調林洙雲楊洛菴楊晉爲陳師顏何民觀楊汝聰楊汝昂陳以樹葉宗竹郭威子先後來送。伯調餽詩扇橘餅橘醬石花。洛庵寄太君芙蓉石觀音一座。陳廷漢寄贈詩扇。汝聰汝昂之兄。以樹名治滋。洙雲之表弟。洙雲爲我抄



所知錄。臺灣紀略。海上見聞錄。竟。林同人亦歸我柳邊紀略。高斯億寄示玉枕蘭亭二種。定武類  
上蘭亭各一。翻刻聖教一。還之。午後發洪山。微雨。泊竹崎。夜大風撼舟。不成寐。是日行四十  
里。

二月初三日丙辰 清明。風雨。早發竹崎。閱海上見聞錄。臺灣紀略。二書皆紀鄭氏事也。薄暮抵水口。  
蓋公濬舟以私鹽故。爲鹽使者家奴所留。楊子屬護行將弁爲言。久之乃放還。夜微雨。是日李和陽  
來奔喪。

初四日丁巳 陰晴相錯。已刻發水口。楊晉爲葉宗竹陳以樹郭威子別去。閱所知錄。所知錄者。記隆武  
紹武永曆朝事。及大悲東宮童妃三疑案。阮大鍼本末。桐城錢秉鏡之所作也。薄暮泊谷口。是日行  
三十里。中丞第六弟李齊菴來奔喪。夜大雷雨。

初五日戊午 陰雨。平明發。作題藍采飲溪行詩冊時。采飲公濬別字也。過公濬舟談。久之乃還。午後  
泊張吳坂。是日行四十里。夜大雨達旦。

三月初六日己未 漸霽。平明發。上折紙羅漢箭孔三灘。泊茶洋。修本年日記。李和陽餽果餌。是日行五  
十里。

初七日庚申 晴。風寒。平明發。上九道小香大香三灘。存疑一。纂過眼錄書要金石剩語。夜泊十里菴

。是日行五十里。李和陽來。

初八日辛酉晴。平明發。十里泊延平府浮橋下。遣使問顯欽哉。欽哉使來。致一下程空帖。却之。同藍公漪入城散步。城中新火。街市蕭然。公漪曰。北城有先鋒樓。以先鋒某死黃巢之亂而名。五代時構也。申刻行。上小鑿大鑿二灘。野泊。是日行二十里。夜召公漪飲。

初九日壬戌晴。平明發。至黯淡灘。十餘人挽乃得上。閱袁柳莊相法全編。腹痛脾泄。再上油灘龍孔灘。夜泊環山口。是日行五十里。

初十日癸亥晴。平明發。上獅子盆壑烏雅四灘。藍公漪贈嶺南三大家詩選。三大家者。屈翁山大均。陳元孝恭尹。梁藥亭佩蘭也。又贈翁山詩扇。閱藥亭翁山詩。是日午後得風。行七十里。泊石麻。過李和陽舟。代尺牘一。夜觀野燒。招公漪飲。

三月十一日甲子晴暖。平明發。十里泊建甯府臨江門外。甌甯縣知縣陳佩來朝儼。前建甯府知府程松鼻仕來。皆舊交也。佩來餽武夷茶二篋。贖十二兩。松鼻餽茶一錫。劍津楊羅李三先生集。申刻發。上雞公灘。行五里。野泊。

十二日乙丑晴熱。有服葛者。爲李霽菴書扇。閱三大家詩選。獨漉堂爲上。道援堂次之。六瑩堂又次之。六瑩藥亭堂名。獨漉元孝堂名。道援翁山堂名也。過藍公漪舟。同殷彥來飮。龔采臣來。采臣

名渤。建安縣丞。自言楊子同鄉。二十八年前曾過我居。楊子不識也。卽過王經千舟談。久之乃去。是日午後見雨。上阿彌陀佛紅硃泮梁星同和尚雞心六灘。行五十里。泊青洲。

三月十三日丙寅晴。躁熱。午後雨。平明發。上磨欄大米小米牛頭牛爪牛尾雙門鴨子樹林九灘。腹痛。

殷彥來招同公漪完璞小飲。王經千亦會。是日行三十里。泊小福。夜雷雨達旦。

十四日丁卯雨。水漲。平明發。上雞母小太七里剪刀四灘。得李松客揚州札。是日作醴泉銘二跋。行

三十里。泊水吉。夜微雨。

十五日戊辰微雨。平明發。上遇龍灘。卽泊。是日行二十里。修書表。腹痛。薄暮藍公漪來談。夜微

雨。夢鑿耕。

十六日己巳雨。平明發。上梁墩大羅小羅六牙四灘。採林同九來齋金石考略入書要。薄暮過藍公漪舟

閒話。是日行三十里。泊連甌。夢張敬止。又夢王順郎變爲偉丈夫。

三月十七日庚午霽。平明發。上倒澗塔嶺老虎下杭上杭柳林六灘。泊茶村。已暮矣。是日行四十里。采

來齋金石考略入書要。王經千來。卽去。腹脹而鳴。

十八日辛未曉霧。辰晴。平明發。過蕉溪。上擊艇太州錄錄老鼠四灘。泊觀前。觀前老鼠灘。溪山頗

佳。王經千襲宋臣來談。是日行四十里。采金石考略入書要竟。

十九日壬申晴。午後大風。平明發。上三篙溜太平臘黎將軍三灘。泊新嶺。是日行二十七里。藍公濬爲楊子鶴印章八。一曰楊賓之印。一曰鄉思樓。一曰抱香書屋。一曰赤泉楊氏家藏。一曰大瓢山人。一曰大瓢。二曰鐵函齋。

二十日癸酉晴。平明發。上楊子黃榜火燒柳林孤老五灘。行十三里。抵浦城。登岸。與藍公濬殷彥來共寓詹姓店。過李和陽。和陽不欲爲同人雇過山夫。楊子言于王經千。強而後可。作報李松客札。

三月二十一日申戌晴熱。同彥來完璞拜李中丞樞前。并視李霽菴李和陽。還爲居停主人書聯。和陽餽席。薄暮雷。是日爲護送武弁所侮。愠久之不釋。夜復以他事愠。

二十二日乙亥晴陰相錯。爲居停主人書招牌。藍公濬所強也。過山夫來。束裝既就矣。忽爲李和陽撤去。怒。午後和陽屬王經千來解。夜微雨。

二十三日丙子晴。夫來。束裝。爲藍公濬索夫二。雇夫二。是日中氣不定。

二十四日丁丑晴。同殷彥來朱完璞辭李中丞靈輻。先發。五十里分宿漁梁。觀村劇。夜不成寐。

二十五日戊寅陰。平明發。度梨楓二嶺。未至楓嶺三里曰柳家墩者。峭壁巖然。入行其腰。隔溪草木蒙茸。綴以紫藤杜鵑金櫻樹葉。五色相間。而畫眉聲復與溪流相應。闔行最佳處也。宿廿八都。

三月二十六日己卯晴陰相錯。平明發。度羊牯小竿仙霞四嶺。行五十五里。宿峽口。薄暮微雨。

二十七日庚辰雨。平明發。行五十里。抵清湖。主毛天復家。李秉公來。卽往視之。晤王源長。又過殷彥來。還買兩舟。源長彥來先後來。

二十八日辛巳微雨。辰登舟。又以一舟載藍公濬。已發清湖。至雙槍。颶風作。泊久之乃行。夜泊大溪灘。風雨。是日行四十里。殷彥來買舟先發。

二十九日壬午雨。午後欲霽。平明發。過藍公濬閒話。行八十里。泊衢州。與殷彥來會。夜雨。

四月乙巳初一日癸未曉雨。辰霽。平明發。泊蘭谿。是日行二百里。薄暮腹痛。早臥。

初二日甲申晴。午後陰。曉發。揚帆過七里灘。得一截句。又作嚴陵道中詩。行二百里。泊桐廬。夜風撼舟。有戒心。

初三日乙酉雨。午後止。曉發。二百里泊富陽縣春江第一樓西。市者多紹興人。沽紹興老酒。酌朱完璞。登岸散步。同藍公濬觀吳兒演劇。

四月初四日丙戌微雨。申時霽。抵杭州閘口楊五官店。行百二十里。朝廷第五次幸浙。入城已三日矣。是日作弔姚玉階詩。

初五日丁亥立夏。陰。入城尋翁康飴。不值。又尋許子厚。飴。子厚言朱敬敷不別主人而歸。楊子不擇。子厚送至中途而別。夜雷雨。是日遣秦德買舟北新關。

初六日戊子雨。與藍公濬別。同殷彥來宋完璞出關。分舟北行。夜泊謝村。

初七日己丑陰。曉發。核資斧帳。共用銀三十二兩有奇。夜泊前馬頭。

初八日庚寅陰。五鼓發。薄暮抵家。殷彥來餽武夷茶玉杯。返其玉杯。餽以食物。送之歸揚州。夜不寐。雨。

初九日辛卯陰。分諸子婦見禮。

四月初十日壬辰晴。揚曰恆來。拜隣人。又拜張友鶴朱冠三陸其清楊象熙王南珍王念農徐子清錢次安陳孫仲。皆不值。又過張周玉揚震伯楊宣仲楊文叔趙宣城顧敏公張堅孟。又探王東發之喪。視亡友顧小謝汪淡洋之孤。各餽銀物有差。又餽震伯其清閩物。課子。夜與塾師張周定小酌。是日語多傷氣。

十一日癸巳晴。姜道泳陳孫仲楊震伯來。赴顧敏公之招。晤杭州汪俊巖。

十二日甲午陰。過姜道泳。借宋搨十七帖。蘭亭序。又拜袁安吉李殿公。皆不值。又拜姜岳來姜輪周徐用王陳燮公陸紆宜。又拜蘇州同知張采。通判許式如宋義存楊瑞文顧伊在孫弘九。皆不值。歸遺殿公於家。夜雨。

十三日乙未雨。宋義存來。不面。夜雨。閱姜氏十七帖。

十四日丙申陰。午後霽。周大元顧殿旭王念農黃宗夏姜熙文先後來。

四月十五日晴。拜宋聲求宋念功顯殿旭周大懸。皆不值。拜申惠吉童鹿友宋駿功。還見張敬止京師札。陸紆宜來。聞天子還吳門。

十六日戊戌微雨。有內閣侍讀學士黃秉忠者。楊子舊識也。扈從來吳。主于隣人之家。楊子往視之。又拜查聲山于舟中。以哆囉贈之。錄書目。陳秉之來。

十七日己亥雨。申惠吉來。姜道泳辭。還答拜陳秉之。不值。過姜學在。送道泳行。歸其十七帖蘭亭。并餽食物。爲人書扇。夜雨。是日同壁過張友鶴。觀高方榜書。

十八日庚子雨。黃宗夏謝野臣馮繁南倪自申倪德符張友鶴劉正則先後來。設座鄉思樓序法帖。聞朝廷幸虎丘。

十九日辛丑晴。坐鄉思樓。張素民陳孫仲來。不面。

二十日壬寅晴。答拜汪駿巖印乾初。陳孫仲來。借申惠吉淳化閣帖。卽作札歸之。學書。黃宗夏來。同饁耕觀裁衣。朱敬敷招食春餅。

四月二十一日癸卯晴。亡友顧小謝婦趙以其遺腹子全來。拜楊子爲父。而趙則認太君爲母。爲全製衣冠而遣之。聞藍公濬至胥門天妃宮寓。卽往晤之。并拜張超然。馮恆南來。是日朝廷北還。范隆吉來。

二十二日甲辰晴。馮恆南來。留之飫。卽往報之。又往橫塘。哭王東發。又拜蔣瞻雲。

二十三日乙巳晴熱。拜許竹宜。召張超然藍公濬陳孫仲飲。侯官陳集斯學孔來拜。并留共飲。頃之。同張藍觀劇天妃宮。還。張友鶴朱冠三同高義立來。義立名方。

二十四日丙午晴。躁熱。拜徐章仲韓敬一汪右衡朱天寧朱亦韓韓祖昭顧躍如。又拜汪武曹顧虞佩范道源范深源韓祖語蔡九霄。皆不值。又過張友鶴。答高義立。遇李克山。

四月二十五日丁未晴暖。答拜陳集斯。不值。祀火神。演劇睇髮堂。翁康飴來。韓敬一招飲。辭。蔣芳似來。借日課冊頁。

二十六日戊申陰。徐章仲來。顧虞佩來。不面。朱完璞招食春餅。李竹君靈輿至胥門。卽往視之。夜雨。

二十七日己酉雨。汪西亭顧虞佩來。俱不面。命璧稟李質君。招王源長王經千李斐莖朱完璞朱敬敷飲鄉思樓。傷風。夜疾作。

二十八日庚戌霽。闔門掃墓。疾不食。更餘還。

二十九日辛亥陰。召醫服藥。孫弘九來。歸李和陽釋史。葉芬先來。不面。

五月丙午初一日壬子晴陰相錯。謝客養病。餽陳燮公節物。



初二日癸丑 陰。汪武曹來。姜熙文來。餽枇杷新茶。夜雨。

初三日甲寅 晴。謝客。徐章仲招五日飲。辭。爲人書。

五月初四日乙卯 晴陰相錯。爲姜熙文書。赴韓敬一之招。同席者陸石渠陸王在徐章仲莊肇升黃宗夏孫弘九。薄暮還。是日王南珍來。不面。楊震伯招次日飲。辭。夜雨。與楚萍五金。

初五日丙辰 晴熱。命璧琮等合藥。將以博施也。召陳孫仲飲。夜雨。是日餽孫弘九龍眼膏武彝茶。

初六日丁巳 陰。午後雨。爲人書。夜課理。責之。

初七日戊午 陰。韓敬一來。戲書百字。

初八日己未 陰。拜府庫大使王羽大鴻。又拜毛德隣金見素字舒忠。見素家藏宋搨各帖。因索觀之。又赴

城隍廟前骨董店觀殘帖。答拜葉芬先。不值。還市宋搨聖母序及游師雄碑。羽大來。不值。

初九日庚申 晴。同楚萍朱完璞朱敬敷過李殿公。因同觀劇。遇汪駿巖楊象熙。還見金見素答拜帖。蔣芳似來。市明詩綜。

初十日辛酉 晴。命饒耕率壁及繼家婦掃前冢婦金氏之墓。爲人書。札金見素借宋搨聖母帖。并以東陽蘭亭敘與之。得報。

五月十一日壬戌 晴熱。爲人書。黃宗夏來。餽之。歸金見素聖母帖。見素報以字扇。朱尊聞來。

十二日庚亥晴。午後陰。張友鶴蔣芳似毛德隣先後來。爲人書扇。張允言來。爲福建新巡撫張伯行諮訪利弊。以實告之。過李和陽舟。還閱別本黃庭經。爲之跋。夜允言來。詢閩吏賢否。列單與之。雨。

十三日甲子曉雨。午陰。張允言招陪張孝先于胥江舟次。是日李質君靈舟北發。

十四日乙丑晴。王源長李斐楚來辭行。同朱敬敷朱若宿觀劇朱家園。將往光福。不果。爲人書扇。

十五日丙寅晴。同朱尊聞訪繆文子。觀宋搨小字麻姑帖并陰。宋搨聖教序。明搨梁師亮蕭師亮李文各墓誌銘。還。將追送李質君靈舟。治裝。文子來觀帖。以東陽蘭亭。查氏蘭亭。玉版十三行與之。市宋搨蘭亭。

五月十六日丁卯晴。同朱敬敷及璧登舟。過半塘聖壽寺。尋吳商志。不值。過虎丘。市舊搨黃庭經。禮泉縣蘭亭。後有跋。度泚墅關。夜乘風行。

十七日戊辰晴。乘風行。作壽李松客詩。越李質君靈舟。夜泊丹徒鎮。

十八日己巳雨晴相錯。已刻抵揚州鈔關門。同璧入城。尋郭乾爲。不值。至天寧寺尋寓。不得。還寓關口胡店。書壽李松客及贈周燕客詩綾。燕客名在郡。揚州同知。楚萍友也。

十九日庚午晴陰相錯。同璧祝李松客生日。遇前常州通判徐葵園日忠。揚人梁五葵。及其幕客張去幹

邵仲白。食麵而出。遣壁先還。拜許荔生卓子任王山公王竹村王鶴臯王  
李久于唐序皇汪 葉  
東子。皆不值。又拜閔左臣。餽。聞蔡瞻巖訃。還遇陶天一。是日荔生來拜。不值。

五月二十日辛未晴。拜周燕客勞啓帖。還遇陶天一。屬敬敷纂書要。

二十一日壬申晴熱。閔左臣來。李和陽舟至。卽往尋之。拜李質君靈。遇李松客。談久之乃還。見周  
燕客殷彥來王山公王竹村王鶴臯王之珂答拜帖。燕客鶴臯餽食物。却之。山公名復衡。王楚士之父  
。竹村鶴臯皆其弟。之珂則其長子也。唐序皇葉芳杜葉子山先後來。芳杜攜宋搨寶晉齋帖十本見示  
。葉子山故人葉桐初之子也。

二十二日癸酉晴。桐城方扶南來。扶南名世舉。程松臯之甥也。卽往報之。并拜費紫蘅。歸未至寓而  
紫蘅來。亡友葉桐初之子子山持其父沙溪廬墓圖索題。爲書二截句于別紙。子山窮途。以其外祖杜  
子皇所藏李英公碑問售。與之直。又以五星贈之。代李和陽尺牘六。作寄高鏡庭金長源楊浴菴程松  
臯陳佩來札。夜熊永侯來。是日遣吳成持札問譚書兩。

五月二十三日甲戌晴。費滋蘅札至。爲李業公跋高氏聖教序。華東子來。過紫蘅。同之訪蕭也堂。不  
值。又同訪石濤道士。石濤者。宗室靖江王之後也。一字清湘。有書畫名。觀宋搨蘇東坡與文與可  
洋州詩帖。又同赴閔左臣飲。同席者閔右臣蕭也堂。爲人書。又同訪周儀一。不值。過其隣哈無技

。觀元明人書畫。還。也堂來。示我萬石莊藥。夜思歸不寐。

二十四日乙亥晴。過李和陽舟。又哭蔡瞻岷于廣儲門。又視李久于疾。許荔生招飲至聽堂。同席者南昌府同知薛葵。費滋衡來。示我詩賦。

二十五日丙子晴。李和陽移舟塔灣。卽往視之。方扶南葉芳杜葉子山來。爲費滋衡跋姜西溟書。赴葉東子之招。同席者江寧陳殿聖。南昌曾黃村。秦興王歙州。及陶天一。方南扶。薄暮散。

二十六日丁丑微雨。李和陽舟中護送把總沈文舉爲其同行卒所傷。商之李松客。出。葉芳杜招同葉子山登舟遊紅橋。閱左臣亦會。縱觀芳杜藏帖。入夜乃還。見陳颺聖王歙州曾黃村刺。

五月二十七日戊寅晴熱。過李和陽舟。又答拜陳颺聖曾黃村王歙州。又拜巴繡天。不值。過閱左臣。又同過李松客。松客屬過和陽。飭而歸。作題歙州天女圖詩。周燕客餽銀爵草葛各一。作寄陸緗札。吳成歸自南京。得譚書兩報章。

二十八日己卯晴。李和陽來。同李斐齋過李松客。還。方扶南殷彥來先後來。爲葉芳杜題跋寶晉齋帖。景龍觀鐘銘。松客餽驢二十四兩。陶天一來。

二十九日庚辰晴。札閱左臣及方扶南。送李中丞靈輻陸行。作寄孫愷似書。得左臣報章。及紫金錠。市舊緝景鳳樓帖。李松客使至。葉芳杜來。示以行笈法帖。并以俞氏宣示與之。夜李斐齋辭還洛

日。

五月三十日辛巳晴。閱江都縣沈文舉等口供。初文舉爲同行卒劉起鵬所傷。楊子以弁卒離汎。有干吏議。改沈文舉爲隨福建巡撫標官頭。起鵬爲健役。而縣供則仍有差訛。至是并改之。辭李松客及般彥來。還。陳颺聖來。屬陶天一寄雜物歸蘇州。閱左臣索黑豆丸。并方與之。

六月丁未初一日壬午晴。曉發揚州。七十里至儀真縣。易小舟至南門外閣下。買漁舟。行十里。泊新河口。

初二日癸未晴。曉發。微風揚帆。及午風息。至燕子磯。颺作。掛席行。頃刻至南京水西門。先入譚書兩江甯縣署。書兩禱雨朝天宮。卽往就之。屬敬敷壁移行李寓朝天宮。晤汪平階。

初三日甲申晴熱。晤譚四友高念祖周大懸張素行沈寅中孔道玉張雲臣。陳颺聖來。不面。夜書兩以縣事相商。

六月初四日乙酉晴熱。尋朱師晦。不值。值其弟尙符。索觀其家藏法帖。惟廟堂碑古柏行孔宙碑乃舊拓。餘無足觀。又拜陳颺聖。還。閱江甯縣志。作致張殿颺札。索瘞鶴銘及借券。

初五日丙戌晴。大熱。遣吳成之鎮江致張札。朱尙符來。拜方靈臬黃際飛。皆不值。赴陳颺聖飲。見其仲子穠林。還遇陳定九兼汪若冰。

初六日丁亥晴。大熱。方靈臯來。第六姪琦來。初公榮之婦病且死。以琦養於妹壻伍敬玉。伍回回教也。琦遂入其教。且改姓名爲伍士經。至是來見。幾不知爲楊氏子矣。楊子不悅。是日書兩請汪若水登壇祈雨。晤章成叔。夜酷熱。

初七日戊子晴陰相錯。閱張素行所藏關帖六本。尋張在垣。不值。過伍敬玉家。赴方靈臯飯。遇朱履菴葉子山。觀舊搨十七帖。廟堂碑。蘭亭敘。攜之還。夜酷熱。

初八日己丑晴。酷熱。作方靈臯十七帖廟堂碑蘭亭敘跋。黃際飛來。同壁尋各書坊。市闔小紀。及泰山銘。中興頌。蒼公頌。陰符經。五鳳磚。餘清齋及他本十七帖。傳雲館黃庭經。還。作張素行關帖跋。陳定九來。不我留溪外集。及留溪草堂游稿。不面。夜酷熱。不成寐。

六月初九日庚寅晴。酷熱。書張素行關帖跋。尋陳定九。還。幾中暑。臨廟堂碑百餘字。吳成歸自鎮江。得張殿鸞報及借券。蔣湘帆札寄一葛。琮至自蘇州。

初十日辛卯晴。大熱。書方靈臯三帖跋。又批閱其近文三篇。拜武進星家金軒磊。還閱閩小紀。晤陳定九孔道玉沈寅中周大懸張安谷于書兩寓樓。安谷名宗禎。江甯學訓導。蘇州人也。葉子山來。與琦黃草花葛一。寅中信我泰山銘。

十一日壬辰晴。大風。札方靈臯。歸其文稿法帖。金軒磊來。屬敬敷壁纂書要。伍敬玉來。不面。閱

二閩小紀。夜雨。足浮腫。晤張安谷。

六月十二日癸巳。曉涼。晴陰相錯。午後見雨絲。張安谷方靈臯來。靈臯贈我秋石二餅。過伍敬玉。又拜安谷。遇蔡鉉升陳定九方江自。同飲明德堂。堂額文文山筆也。觀皇象紀功三段石。石在尊經閣下。薄暮還。

十三日甲午。晴陰相錯。風。爲人書扇。張安谷陳定九先後來。書兩屬草總督邵穆希禱雨疏。有舊家子持七佛頭未斷聖教序來。高念祖示我雜刻。并以募刻忠節錄引索改。報之。沈寅中歸我泰山銘。夜書兩改壇黑龍潭。移襍被去。

十四日乙未。晴。酷熱。譚書兩遣使餽錢米。市天璽七。觀趙臨樂毅論帖。陳繡林來。拜王伏草著。而伏草已來。還與談。久之乃去。伏草亦好金石。贈以東陽蘭亭。及萬安橋記。借其蘭亭八種。廟堂天璽碑各一。石雲先生金石評考一卷。張安谷札贈心知集。卽赴其飲。以延平答問報之。同席者吳靜夫蔡鉉升方江自。暮乃還。見汪平階札。是日遣壁學六壬數于陳定九。伍敬玉餽食物。其婦胡寄鑄耕紗扇。

六月十五日丙申。晴。酷熱。方靈臯蔡鉉升張安谷來。久之不去。不得已。卽之。爲人書。歸王伏草諸帖。題嘉興錢蕉隱遺像。汪平階所屬也。金軒磊來談。

十六日丁酉晴。午後見雨。札陳定九。將歸吳門。過譚書兩烏龍潭雨壇。不值。值汪平階而還。遇定九。傳壁數學。遂與之談。飭之。定九去。書兩來。王伏草札亦雜刻。歸楊子畫扇。報之。并歸其金石評考。札張安谷。得報。屬壁爲陳繡林札范隆吉。伍敬玉來。金軒磊以江亭送別圖屬題。爲題作斷句二首。

十七日戊戌晴。風。曉涼。午熱。爲人書。過高念祖。不值。值譚四友張素行。還。伍敬玉來。題金軒磊江亭圖。陳殿聖送翻刻聖教及舊搨二王殘帖來觀。留其殘帖。敬玉遣使餽果餌。過譚書兩齋壇。夜乃還。是日以燭酒壽書兩之婦朱。

六月十八日己亥晴。過譚書兩雨壇。爲伍敬玉索祖坟示。夜方靈臯來。

十九日庚子晴。午後雨。汪平階來。飭之。同朱敬敷及子任祝朱夫人壽。與高念祖談。閱其忠節錄。食麵而還。歸陳殿聖二王帖。爲人書扇。

二十日辛丑晴。初楊子薦敬敷于譚書兩。書兩旣致聘及安家矣。至是送之入署。書泰山銘跋于帖。屬敬敷售沈寅中。書兩來送。餽贖十六兩。并餽壁贖。陳殿聖陳定九金軒磊先後來送。午後乘肩輿。率壁琮跨驢行。宿秣陵關。

二十一日壬寅晴。曉發。宿白兔。夜有雷雨。



二十二日癸卯晴。酷熱。曉發。辰刻抵丹陽西門。買舟行。夜泊常州。

二十三日甲辰晴。酷熱。曉發。抵閩門。門將闔矣。同壁先還。見杜樊川馮嗣度及謝錦刺。謝錦者不知何許人。樊川則新授丞。之任過此也。夜酷熱。汗如雨注。

六月二十四日乙巳晴。酷熱。見逸倫及瑞楨。逸倫者楊子叔祖也。安城將建家廟。逸倫來告。楊子許助銀三十兩。而先與十兩。黃宗夏來。不面。

二十五日丙午晴。大熱。葉來。不面。爲人書扇。朱尊聞來。命壁過陸籽宜。

二十六日丁未晴。酷熱。遣琮送劉家二姑及逸倫瑞楨還故鄉。餽逸倫贖一兩。葛一端。瑞楨銀三兩。二姑娘銀四兩。又寄董茲全閩中土宜。及壁娶媒儀杯幣。又寄金孟侯朱行四楊舍之德音各土宜。

二十七日戊申晴。酷熱。坐鄉思樓學書。纂夢想過眼二錄。

二十八日己酉晴。酷熱。楚萍病革。未時歿。夜買板合棺。

六月二十九日庚戌晴。酷熱。未時殮楚萍。戌時其後妻馬亦死。夜買棺。名楚萍第三子十一曰瑱。第四子十二曰瑜。

七月戊子初一日辛亥晴。酷熱。遣使至故鄉報喪。未時殮馬氏。是日收養珩瑛瑜。

初二日壬子晴。熱。陸籽宜來。出見鄉思樓下。忽爲冷風所吹。語未畢。還臥。發汗。召醫王晉三診

脈。服藥。屬子姪移鄉思樓書籍于他處。

初三日癸丑 晴。熱。力疾成服。服藥。

初四日甲寅 晴。熱。延玄妙觀道士潘允章等十人。建解穢度亡道場于鄉思樓。

初五日乙卯 晴。熱。畏風。屬子姪禮神。服藥。祭楚萍。

初六日丙辰 晴。熱。畏風。服藥。屬子姪禮神。祭楚萍之婦馬氏。

初七日丁巳 晴。熱。屬子姪禮神。琮同馬氏之弟馬子敏來。得董茲全報。夜放焰口。辭楚萍夫婦靈。

初八日戊午 晴。黎明送楚萍夫婦靈柩。寄瑞光寺之臥佛室。命珩等守靈。是日鑿耕疾。朱雪鴻來。

七月初九日己未 晴。避風。醫來。

初十日庚申 晴。朱雪鴻來談。

十一日辛酉 立秋。薄暮雨。

十二日壬戌 晴。熱。楚萍亡已二七矣。助馬子敏祭于瑞光寺。延七道士。爲馬孺人接煞于家。

十三日癸亥 晴。馬孺人二七。助石公祭於瑞光寺。延七道士。接楚萍煞於家。瑞光寺西禪堂宗僧以牧

餽桃。報以花筍洞庭春茶。

十四日甲子 晴。午後見雨。親友來祝壽。夜雨。

十五日乙丑 風雨。祀先。夜祭無主孤魂於朱家園。饒耕意也。凡七年于茲矣。

十六日丙寅 晴。拜織造李萊嵩。不面。而其幕友陳趙諸君。爲黃宗夏作寄譚書兩書。爲劉補過作寄張豐村書。過許式如。不值。

十七日丁卯 晴。謝壽。黃宗夏來。留之小飲。夜雷雨。

十八日戊辰 晴。爲劉補過作寄費厚凡書。復移書籍于鄉思樓。爲人書扇。夜雷雨。

七月十九日己巳 雨。楚萍三七。助謝中立祭于瑞光寺。還。閱明詩綜。

二十日庚午 陰雨。爲人書。馬孺人三七。遣子姪祭瑞光寺。爲黃宗夏作寄祝任菴札。

二十一日辛未 霽。學書。纂書要。課理讀書。馬子敏辭還山陰。餽之以贖。楊震百來。聞何屺瞻丁外艱歸里。傷食疾。

二十二日壬申 晴。率琮纂書要。族僧以牧同沈虛谷來。贈以書扇。并書他紙與之。黃宗夏辭之京師。作寄張敬止陸紫綳及屏侯札。

二十三日癸酉 晴。過李殿公及何屺瞻何心友。屺瞻心友不面。拜陳子文。觀其藏帖。及所撰金石遺文錄。留飲。飲畢。贈我虞州集十六寫。天下第一郡樓記一首。蔡夷吾蔡吉水贊墨搨。過潘章可陸耕宜。又過孫弘九。不值。是日沈宜士來。不值。

七月二十四日甲戌晴。過沈宜士。晤李萊嵩。拜何章漢。還。作寄譚書兩朱敬敷札。陳子文來。觀藏帖。以煙鶴銘。般若臺碑。泉南佛國大字。全閩第一江山王審知德政碑。龜頭碑。薛老峯碑。東坡書方公墓碑。新有社碑贈之。纂書要。申刻見雨點。

二十五日乙亥晴。熱。纂書要。跋家藏舊拓麻姑壇。李殿公來。見大瓢日課冊。強取而去。爲劉正則作寄譚書兩札。何漢章來。示以藏帖。

二十六日丙子晴。大熱。楚萍四七。祭于瑞光寺。過以牧。爲之書。馮涵度來。不值。還。往尋之。已移寓矣。又過王茲來王南珍王念農。南珍念農不面。陳繡林來。不面。卽往答之。則已行矣。又過楊震百。

二十七日丁丑晴。酷熱。蔣芳似來。劉正則引抄書人吳子益來。率琮過裝帖店議價。又過寶林寺。遇僧杲瞻。觀其藏帖。還。遣子姪祭馬孺人于瑞光寺。札繆文子。借李文帖。得報。并不智永千文。楊子亦以七佛頭聖教及舊榻麻姑示之。札張友鶴。以扇索高義立書。

七月二十八日戊寅晴。酷熱。爲人書。張友鶴高義立來。觀法帖。札贈陳子文連江石鼓文。戴田有來。申時見雷雨。張周定來。夜。楊文叔有蜀中之行。來話別。

二十九日己卯晴。酷熱。爲人書。屬謝中立張周定分纂書要。以湖筆字扇贈楊文叔。并以王藻儒學政

條終四川碑目與之。薄暮雨。

八月己酉初一日庚辰晴。酷熱。書靈光殿碑刻蒼頡頌。停雲館黃庭。徐茲本及肥本蘭亭跋。得陳子文報。

貽我壇山石刻。白石神君碑。崔敬邕碑。曹景完全碑陰。纂書要。

初二日辛巳晴。熱。札陳子文。得報。子文之子處一世泰來。觀法帖。書家藏九成宮跋。以牧蔣芳似

先後來。吳子益增執贊請爲弟子。留之。纂書要。爲人書。

八月初三日壬午晴。答陳處一。示以闕里元碑。晤陳子文。及會稽王爾升。無錫朱贊皇。借池北偶談。

晉稗。子文贈我郭敬之碑陰。又拜常熟馮寶伯。晤繆文子。歸其智永千文。索同七佛聖教及舊揚麻

姑。假其九成宮。拜其弟武子。不面。還。爲人書。朱敬敷歸自江甯。得泰山銘。楊子前所購也。

藏田有札至。夜半雷。雨如注。

初四日癸未晴。未申間雨。爲繆文子跋別本九成宮。楚萍五七。祭於瑞光寺。還。爲人書。閱池北偶

談。纂書要及日富續編。

初五日甲申晴。札陳子文。示以來齋金石考。閩小紀。并以七佛聖教序索跋。爲人書。跋家藏九成宮

帖。馬孺人五七。遣子姪祭於瑞光寺。王聲弘來。贈我唐鑄萬潛書。嗽不止。延醫診脈。

初六日乙酉晴。涼。始去葛。馮寶伯繆文子來。示我書學正傳。蔣芳似高義立先後來。爲人書。嗽。

閱池北偶談。纂日富續編。書要。李客山投我五原堂集。客山名果。蘇州人。寶伯名武。號簡緣。常熟人。夜嗽。不成寐。

八月初七日丙戌晴。陳希文來。札戴田有。致潛書。過王聲弘。借金石錄及漢帖六本。還。先歸其漢帖。爲人書。閱池北偶談。屬吳子益採金石錄入書要。太君疾。召醫進藥。纂日富續編。金石剩語。

初八日丁亥雨。侍太君疾。爲人書。陳燮公李殿公先後來。采金石錄入書要。

初九日戊子陰雨。太君疾愈。爲人書。楚萍幼子瑜殤。采金石錄入書要。繆武子來。武子名曰芭。文子弟也。

初十日己丑陰。譚書兩使至。汪平階張來。同朱敬敷過書兩寓。不值。還。纂書要。爲李殿公書東西銘。及他人書。借以收及書兩先後來。以燭麵壽內母史太君。

八月十一日庚寅晴。躁熱。楚萍六七。遣子姪助朱敬敷祭於瑞光寺。張友鶴來。索與譚書兩札。爲人書。陸籽宜來。札歸王聲弘金石錄。札馮寶伯。借書學指南。翰林要訣。得報。餽書兩食物。

十二日辛卯晴。吳飛霄孔道玉張素行來。札馮寶伯。歸其學書正傳。翰林要訣。書學指南。爲人書。朱天藻沈虛谷來。作題王聲弘濯足圖詩。及崔敬邕碑跋。馬孺人六七。遣子姪祭于瑞光寺。

十三日壬辰晴。爲王聲弘題濯足圖。聲弘來。爲人書。餽譚書兩主賓酒肴。及陳燮公節物。是日痢不止。服香蓮丸。魏東之朱尊聞來。

十四日癸巳晴陰相錯。薄暮三見微雨。過譚書兩舟。遇蔣賓野朱多青。還。爲人書。餽陳子文節物。不受。又餽隣人李麟伯壽儀。以牧及僧曉麓來。纂書要。馮涵度來。

八月十五日甲午雨。聞市有舊帖。同謝中立往尋。不得。還。爲人書。吳素公楊宜仲先後來。率璧琨拜李麟伯生日。設席酌張周定馮涵度劉補過。夜雨達旦。

十六日乙未陰雨。蔣賓野來。爲人書。采東坡山谷題跋入書要。纂金石剩語。及日富續編。

十七日丙申陰。蔣芳似來。以牧來。札陳子文。歸其晉稗。得報。太君以次日楚萍七終。命預祭于瑞光寺。遇子文。遇查又微。同飲。薄暮還。夜腹痛。下。

十八日丁酉晴。疾。服寸金丹。臥。

十九日戊戌晴。疾已。駱鱗長來。爲陳子文王晉三蔣瞻雲書額。跋天冠山帖贈以牧。又爲他人書。馬孺人七終。屬子姪祭于瑞光寺。祭畢闕靈。命珩等還。札陳子文。葉子山來。不面。馮寶伯繆文子札歸法書要錄。宣和書譜。東觀餘論。廣川書跋。又題安城府君補臂圖冊葉。報之。夜嗽多痰。

八月二十日己亥晴。僧以牧朱天藻來。海甯陳受社來。索書。書慈恩聖教序跋。纂書要。爲人書。是日

太君移楊楚萍之室。

二十一日庚子晴。爲人書。閱唐高宗書李英公碑。指又加寶焉。查又徵馮涵度先後來。皆不面。繆文子札至。報之。纂書要。書新得天璽帖題詞。以五石屬琮求吳緒周篆刻。夜饘耕母史太君病。亟遣饘耕歸侍。

二十二日辛丑晴。熱。潘稼堂來。九有府君忌辰。助石公祭。爲人書。繆文子札至。報之。書家藏山南杜氏黃庭跋。纂金石剩語。采廣川書跋入書要。夜赴李麟伯飲。觀劇。更餘還。

二十三日壬寅晴。熱。題李英公碑。答拜查又徵潘稼堂陳覺公陸籽宜魏東之朱天藻李客山。又徵籽宜客山不值。示稼堂柳邊紀略。閱明詩綜。札蔣芳似。市綏寇紀略。井中心史。

八月二十四日癸卯晴。熱。札陳處一。得報。爲人作細楷。以穎上黃庭蘭亭。易繆文子蕭思亮李文碑。李客山果張友鶴來。授友鶴筆法。蔣瞻雲來談地理。從書賈市宋高宗書禮部韻略。

二十五日甲辰晴。爲人書。札陳處一。繆文子札至。報之。以書帖易史記評林。唐詩鼓吹。陸宣公集。

二十六日乙巳晴陰相錯。薄暮雨。爲蔣芳似書細楷。召潘稼堂陳子文陳處一李又徵李殿公飲。潘查以事不至。子文示我新得諸帖。見陶隱居舊館壇碑。夜閱周燦交使紀事。



二十七日丙午雨。爲陳處一書冊葉。跋自書蔣芳似冊葉。以書帖易國朝典故三十六種。市十種唐詩。及唐賢三昧集。

二十八日丁未晴。周義立來。遣僕引之謁陳子文。札陳處一。歸其冊葉。及舊館壇碑。書建昌麻姑記及茶錄跋。爲人書。題各法帖簽。僧以牧來。蔣芳似札至。札繆文子。示以禮部韻略。卞愚一來。

八月二十九日戊申晴。辰後陰。延醫者王東臯爲朱母史太君治病。陳履之世儼來。爲人書。書張嘉禎北岳碑。歐陽化度寺碑。宋揚聖教序。顏氏家廟碑。館本十七帖跋。繆文子報章至。歸我禮部韻略。蔣芳似來。

三十日己酉雨。過陳履之吳緒周。還。書曹全白石神君蕭思亮碑李文碑壇山石刻跋。札蔣湘帆張殿巖。傷風。

九月庚戌初一日庚戌晴。跋餘清齋十七帖。潘稼堂來。鈔之。閱法書要錄。以牧來。纂金石剩語。痔痛。夜蔣天石王龍篆來。陳定九札至自江甯。

初二日辛亥晴。跋七佛聖教序。王東臯來。採法書要錄入書要。及金石剩語。爲人書。臨聖教百字。初三日壬子晴。採法書要錄入書要及金石剩語。吳緒周刻章五。自攜來見。以李陽冰碑。夢英千文。

郭忠恕三體篆文贈之。繆文子招同石公及馮寶伯高澹游瞿子遠李有斐飲雙泉草堂。繆武子與焉。以

十七帖二種及寶晉齋像贊樂毅論示之。是日命子姪助土龍象祭楚萍夫婦于瑞光寺。夜雨。

九月初四日癸丑曉陰。已霽。爲人書。壁生三十年矣。諸子及婿爲之壽。題跋薦季直表及陰符經。夜閱廟堂帖。

初五日甲寅陰。已霽。自課小楷百字。採說郛入書要。瞿子遠來。索書。子遠名裔縣。常熟人。潘稼堂札致安城府君補臂圖詩。及楊子柳邊紀略序。徐文靖公祠堂記。蔣天石辭還金壇。鮑之璣。

初六日乙卯晴。自課百字。作寄張在垣張豐村札。以牧來。過陸其清。不面。又過何屺瞻。借其墨池堂帖。又過瞿子遠高澹游潘稼堂。皆不值。又過蔣芳似。同之觀棟梅若藏帖。

九月初七日丙辰晴。熱。爲人書。查又微楊震伯蔣瞻雲僧以牧陳梅若先後來。裝泰山銘成。跋其後。未竟。札何屺瞻。索題補臂圖及七佛聖教。歸其墨池堂帖。

初八日丁巳晴。過陳子文。遇莊肇升。借潘稼堂石淙詩序。王居士碑銘。法藏禪師塔銘。梁師亮墓誌銘。重藏舍利記。濮陽卞氏墓誌銘。支提齋銘。永泰寺碑。嶽麓寺碑。李思訓李秀碑。稼堂及楊宜仲來。以牧來索書。夜朱太君歿。哭之。是日殯乳母熊氏亡。

初九日戊午晴陰相錯。跋新得穎上黃庭。臨王居士磚塔銘。爲人書。酌諸食客。送朱太君殮。汪平階來。不面。是日以痔久作楚。煎柿餅及補中益氣湯。

初十日己未 晴陰相錯。爲人書。繆文子札借潘帖。札陳子文。采書史入書要。蔣芳似來。琨疾作。藥之。張允言之姪祖留札來稱貸。不應。

九月十一日庚申 晴。召醫服痔藥。爲人書。采海岳名言翰墨志入書要及金石剩語。質銀四兩。遣王龍篆歸。馮文子來。修翁康飴所贈端硯。作寄張安谷札。

十二日辛酉 晴。痔大作楚。不能坐立。臥服補中益氣湯。高義立李殿公先後來。皆不面。朱太君服成。率子姪助祭于其家。蔣芳似申惠吉來。得第三孫。行曰四。琨長子也。

十三日壬戌 晴。痔痛。張殿颺使持殿颺及蔣湘帆札至。致楚洋奠儀四兩。又致金箋。索壽其太夫人沈五十詩。召張友鶴至。友鶴餽武夷茶一器。得真賞齋帖一本。潘耕堂王晉三札先後至。

十四日癸亥 晴。爲人書。第三孫三朝。洗兒置酒。過陸其清。不面。又過申惠吉。觀碑刻。借其梁主簿碑。入關齋記。黨籍碑。還。夜。痔痛甚。

九月十五日甲子 晴。痔痛。札何屺瞻。索聖教序。補臂圖題跋。得報。札潘次耕。致柳邊紀略。又札馮文子徐用王。俱得報。爲人書。

十六日乙丑 晴。痔痛。札繆文子。得報。陸籽宜劉曉堂先後來。俱不面。旗人趙貢三來問筆法。飮之。陳履之來議貴州館穀。洗痔。

十七日丙寅晴。痔痛。爲人書。痔痛臥不能起。徐用王札至。夜痔痛不能臥。服藥。

十八日丁卯陰。痔痛。纂書要。午後臥。遣壁報陳履之。

十九日戊辰微雨。纂書要。跋粵僧明光書劉繼莊遺詩。以禮部韻略。姜氏蘭亭。易申惠吉梁主簿王居

士帖。爲張殿颺徵壽母詩。痔痛。內外兼藥。夜下血。

二十日己巳晴陰相錯。痔痛。血大下。陳履之遣其所親朱謹安來。議幕中事宜。扶疾見之。劉曉堂來

。以三雅齋黃庭。易趙貢三蘭陵長公主碑。纂書要。

九月二十一日庚午陰。薄暮雨。跋蘭陵長公主帖。伍敬玉來。扶疾見之。屬壁代札答張殿颺。以晶仙銀

爵預祝其母生日。又答蔣湘帆。以玉版十三行包網報之。遣吳成送劉補過謁張豐村于嘉興。以桂盤

髮禱爲壽。而別以端硯及萬安橋碑助補過行。

二十二日辛未陰。書梁主簿王居士合帖跋。馮文子來。求書詩綾。不得已。扶疾應之。召王晉三診脈

。纂書要。夜雨。痔痛不成寐。

二十三日壬申雨。爲人書。痔痛。臥纂書要。夜雨。痔血稍減。

二十四日癸酉陰雨。醫來診脈。痔痛。臥纂書要。午後霽。吳成持張豐村報章歸。

二十五日甲戌晴。聞朱敬敷歸自江甯。扶疾往視之。高澹游爲楊子畫條幅冊來。不面。纂書要。裝

中興頌成。陳子文歸我祕閣黃庭。及潘稼堂七帖。陸其清返夏初所餽物。不見楊子而去。

九月二十六日乙亥晴。痔痛。扶疾跋潘稼堂舊館壇記。臥纂書要。趙貢三遺我滿靴。

二十七日丙子晴。陳燮公張友鶴先後來。不面。扶疾爲人書。以舊館壇記示繆文子。

二十八日丁丑晴。痔痛。扶疾爲人書。纂書要。

二十九日戊寅晴。爲人書。僧以牧沈虛谷以痔藥來。裝中興頌。裴灌少林寺碑。秦王柏谷塢告。嶽麓寺碑。不空和尚碑。北齊孔廟碑成。吳緒周歸我石鼓文諸帖。并以所刻印記來。譚書兩札至。餽伍敬玉食物。以其餘餽高澹游。纂書要。

十月辛亥初一日己卯晴。熱。楚萍第二子瑱殤。纂書要。痔痛。跋北齊孔廟殘碑。不空碑。嶽麓寺碑。中興頌。張友鶴來。題常州蔣石瓠小像。

十月初二日庚辰晴。札何妃瞻。得報。跋柏谷塢告及少林寺裴灌碑。潘稼堂來。不面。遣人歸其法帖。以茶笋餽之。命琨球應童子試。

初三日辛巳晴。張繼儒楊宣仲來。爲人書。酬吳緒周筆。朱尊聞來。

初四日壬午晴。書客持碑刻來觀。市李秀柱礎碑。爲人書。纂書要。札寄朱雪鴻閩茶漳餅。

初五日癸未晴。市泰山石刻。萬歲通天蘭亭。石淙詩序。舊揚廟堂碑。集古法帖。五臺山陀羅尼經。

午後疲甚。臥。是日安城府君生日祭。

初六日甲申陰。午後雨。以集古帖萬歲通天蘭亭不繆文子。文子報得化度寺及祕閣帖。趙貢三餽京師葡萄桃梨王瓜。爲人書。以牧宣仲來。太君疾。

初七日乙酉陰晴相錯。林吉人仲子湘雲來自福州。得林同人楊浴庵札。浴庵寄我共學書院課藝。書買復持五臺山陀羅尼經來。初得五臺陀羅尼經二紙。以爲此經宜有八紙。今尙缺其六。賈復購得之。至是遂全。札繆文子。索觀化度寺碑及祕閣帖。爲人書。

十月初八日丙戌晴。爲趙貢三書金丹四百字。王茲來來。命琨拜林湘雲。太君病痢。兩進寸金丹。是日祀 火神。跋書賈舊帖。

初九日丁亥晴。爲人書。纂書要。侍 太君疾。夜雨。

初十日戊子陰晴相錯。爲人書。得不全持素賦。及顏魯公家廟。孔子廟堂。皇甫君碑。不空碑。多寶塔碑。李晟碑額。跋日課及條幅。札寄張安谷。又作寄譚書兩李松客札。夜雨達旦。

十一日己丑雨。作寄李和陽殷彥來札。各封共學書院課藝。又作寄費滋衛閔可臣札。爲人書。跋昇仙太子碑。夜侍 太君疾。

十二日庚寅陰。召醫張茂山視 太君疾。跋唐汾陰土地祠銘。眞賞齋法帖。玄秘塔銘。蔣芳似來。第

三孫滿月。屬饑耕爲之薙髮。夜進太君藥。雨達旦。

十月十三日<sup>辛卯</sup>雨。召僧爲朱太君誦經。爲人書。召醫視太君疾。進參劑。

十四日<sup>壬辰</sup>陰。午後雨。市漢尹宙魏孔羨碑。爲人書。召醫視太君。進參劑。是日痔稍愈。譚書兩札至。夜雨達旦。

十五日<sup>癸巳</sup>欲霽。題跋孔羨碑尹宙碑。爲人書。莫何楚生于胥江舟次。楚生肥瞻之父也。是日太君疾少愈。夜雨。

十六日<sup>甲午</sup>陰。晚霽。遣珉球覆試吳縣。纂書要。札翁康館。薦書賈邵孔淵。市晉江曹氏蘭亭。說經臺道德經。及米元章墨池大字。召醫視太君。朱敬敷辭之江甯。遣僕朱文從之。

十七日<sup>乙未</sup>晴陰相錯。臨聖教序八十字。爲人書。纂書要。

十月十八日<sup>丙申</sup>陰晴相錯。爲人書。臨聖教序八十字。纂金石剩語。移書籍入鄉思樓。札蔣芳似。

十九日<sup>丁酉</sup>陰。午後微雨。爲人書。太君四肢浮腫。召醫診脈。臨聖教序八十字。得黃山谷中興頌跋。宋慶元六年孫應時書長洲縣主簿廳記碑揚。泰山二世詔。采續文獻通考入書要及金石剩語。夜遣饒耕侍太君。是日張友鶴李客山來。

二十日<sup>戊戌</sup>雨。辰霽。爲人書。臨聖教序八十字。采式古堂書畫彙考入書要及金石剩語。夜寒。

二十一日己亥晴。見峨之子淵如來自故鄉。一鉢而去。臨聖教序八十字。以蘇東坡表忠觀碑。易唐萬年宮銘。陪陳明府修孔廟碑。宋西林乾明寺牒。及蘭亭四種。采式古堂書考入書要。張素明及以牧來。

二十二日庚子晴。臨聖教序八十字。采式古堂書考入書要。李淑人生日祭。以子姪學不進。設關閉之。夜 太君遣饋耕歸。微雨。

十月二十三日辛丑陰。臨聖教序八十字。采式古堂書考入書要。札申惠吉。得報。朱尊聞來診 太君脈。尊聞曰。服鹿廣二膠。腫可消也。夜微雨。

二十四日壬寅陰。欲霽。臨聖教序八十字。采日下舊聞石鼓考入書要。是日顧夫人娶繼子婦。召饋耕挑方巾。夜二鼓冒雨還。

二十五日癸卯陰雨。臨聖教序五十字。往顧氏道喜。過繆文子朱尊聞。借文子聖教序。還。跋曾氏蘭亭。爲人書。采式古堂書考。夜閱子任文。

二十六日甲辰晴。風。臨聖教序百字。跋繆文子未斷聖教序。同張友鶴過積善菴。晤僧利威及高義立。觀祝枝山小行書倚蘭賦。還。見文子借我法書考。墨池編。札文子。歸其未斷聖教序。又借宋揚聖教序。夜寒。



十月二十七日乙巳晴。微寒。臨聖教序百二十字。趙貢三餽紅毛酒一器。爲人書。采盛熙明法書攷式古堂書考入書要。札王南珍。不報。夜課理讀韓文。

二十八日丙午晴。臨聖教序百字。采式古堂書考入書要。王南珍以牧來。

二十九日丁未陰。薄暮見雨。祝來山之南京布政司經歷任。持其兄任庵札至。遺之杯靴肘酒。却其重者。蔣天石札寄玉枕蘭亭。札張安谷。跋李陽冰般若臺碑。李邕雲麾將軍殘碑。采墨池編入書要。以泉南佛國碑遺以牧。夜課子。

三十日戊申晴。跋五臺尊勝經。吳通微楚金禪師碑。又跋泰山篆。未竟。過王南珍。又過張友鶴。不值。還。朱尊聞來。爲趙貢三書弘毅堂匾。

十一月壬子初一日己酉晴。跋泰山篆竟。又跋魯峻碑。札歸繆文子聖教序。法書攷。并以五台尊勝經會氏蘭亭示之。過徐用王。遇陳孫仲章振齋。還。張友鶴來。張周定省覲崇明。屬謝中立入關代庖。

十一月初二日庚戌晴。臨聖教序百字。爲人書。劉曉堂祝希韶王寶傳陳孫仲徐用王先後來。用王以粵西叢載相借。采墨池編入書要。楊宜仲來。纂過眼錄。

初三日辛亥晴。作寄張惟一書。采墨池編及式古堂書考入書要。報祝希韶劉曉堂。不值。搨碑人戈柱天來。柱天名汝砥。徐用王所屬也。太君腫未消。召醫王晉三診脈。

初四日壬子晴。臨聖教序六十字。會稽楊友三來。留之飲。爲人書。采式古堂書考入書要。夜課子。  
初五日癸丑晴。臨聖教序百二十字。采粵西叢載入書要。畢。歸徐用王。復借端州七星志。課子。過  
王寶傳王南珍。皆不面。還。朱尊聞來。

初六日甲寅晴。臨聖教序百二十字。采七星巖志入書要。赴馮文子之招。同席者汪武曹汪右衡吳隱洪  
汪西亭鮑孝儀顧虞佩沈天隨慕蒼玉茹友三朱天標馮方寅。薄暮散。歸徐用王七星巖志。復借融州真  
仙崑黨籍碑搨。夜遣歸耕侍。太君疾。課子。

十一月初七日乙卯晴。劉家姑及金孟厚來。孟厚爲太君診脈。服其藥。臨聖教序百二十字。采墨池編  
入書要。歸徐用王黨籍碑。閔可臣札至自揚州。是日爲太君製棺。張友鶴來。

初八日丙辰陰。臨聖教序百二十字。茹友三來。拜汪西亭吳猗堂。西亭不面。赴汪武曹飲。同席者張  
顧虞佩鮑孝儀沈天隨汪右衡。友三名之增。杭州人。前太倉州知州。猗堂名瞻淇。徽州人。編  
修。名蘇州人。禮部主事。是日陳燮公來。不值。夜課子。微雨。

初九日丁巳雨。已欲霽。爲人書。汪西亭來。答拜茹友三。不值。以牧同僧豐雨來索書。纂書要。夜  
酌金孟厚。

十一月初十日戊午晴。作寒。服灰鼠裘。臨聖教序百二十字。過陳燮公。遇崑山顧西疇。長洲劉子立。

飯而歸。陳履之莊肇升來。挫腰。祝希饒劉曉堂來。觀大瓢圖。汪西亭假我書史會要。古今碑帖考。夜課子。

十一日己未 晴。腰痛不能俯。屬壁鈔書史會要。代陳燮公作壽陸籽宜詩并書。纂書要。作題劉曉堂小影詩。餽陸籽宜壽儀。是日琮之子學三試週。夜課子冰。

十二日庚申 晴。臨聖教序百二十字。采墨池編入書要。吳荷堂來。不面。趙貢三遣使餽藥酒一瓶。以書相正。畢雨稼來。

十三日辛酉 晴。采墨池編入書要。拜陸籽宜生日。過戈柱天莊肇升楊象義。皆不值。又過范書常畢雨稼。還。汪武曹來。

十一月十四日壬戌 晴。太君生日。延八僧誦經。爲人書。采墨池編入書要。

十五日癸亥 晴。董茲全來。爲人書。屬壁札范隆吉。

十六日甲子 曉陰。辰霽。召祝希饒爲 太君及饒耕寫照。留之飲。畢雨稼來。飯而去。

十七日乙丑 晴。過陸籽宜謝壽。采墨池編入書要。祝希饒徐季堂張友鶴先後來。過季堂。還。朱謹安來。

十八日丙寅 晴和。爲人書。采墨池編入書要。

十九日丁卯晴。采墨池編入書要。聞朱字綠姜日千之計。夜侍 太君湯藥。

二十日戊辰晴。爲人書。劉曉堂以牧來。留曉堂飲。

二十一日己巳陰。爲人書。董茲全金孟厚辭還。各餽以贖。屬壁代作答唐宗臣咨伯書。附以警心錄。及楊子書條幅。腹痛。跋張廷珪孔廟碑。

十一月二十二日庚午陰。爲人書。劉曉堂來。汪武曹札至。報之。題跋新得廟堂碑。邠國公碑。萬年宮銘。秋日宴石淙序。腹痛。聞錢蒼液訃。

二十三日辛未晴。臨聖教序百二十字。爲人書。汪武曹來。夜 太君病甚。率諸子姪侍飲食。

二十四日壬申晴。屬祝希饒寫黃冠圖小照。爲人書。陳履之同朱謹安來致聘。初貴州巡撫陳實齋命其子履之秉之來聘。楊子以親老辭。求之十餘次不允。九月中。 太君以貧故。命楊子勿辭。因與議脩廡廚傳。履之請命。得報而 太君病。辭之者再。必不可得。至是以聘來。遂涕泣而受之。是日食新米。薦祖考。夜寒霜。

二十五日癸酉晴。爲人書。過陳子文。不值。值其子宗岱。又過朱謹安。赴茹友三飯。同席者馮方寅馮文子裘妻瞻。還。爲汪武曹作寄閩中諸札。夜傷風。

十一月二十六日甲戌晴。過陳子文。不值。還。 太君病革。延醫宋爾昭診脈。進參藥露。夜三鼓已不

能言矣。

二十七日乙亥晴。太君藥不下。守至夜半亥時歿。

二十八日丙子晴。子時昇。太君尸停晞髮堂。楊子及舉家男婦居喪次。夜守尸。訃親族。

二十九日丁丑晴。督諸子姪辦入殮事宜。讀禮。

三十日戊寅晴。未時殮。太君。凡附身之具。皆親理。毫髮無遺憾。乃入棺。是日董甥元文至。凡送

殮者陳子文馮文子陸紆宜而下十四人。得董茲全金孟厚札。

十二月癸丑初一日己卯陰。始上飯。定家祭規條。製服。夜疾作。

初二日庚辰陰。作祭文。書銘旌。

初三日辛巳霧。晴。服成祭。屬陳定九擇于本月十五日辰時破土。十八日卯時發引。十九日午時葬。

十二月初四日壬午陰。風。再定家祭規條。屬璧親輩經畫開喪事宜。董元文辭還紹興。夜雨。

初五日癸未雨。午後霰。定家祭桌位。作范孺人家傳。楊友三來。刻訃帖成。夜雪積二寸。大寒。

初六日甲申雪。修支譜。繪世系圖。友三辭去。夜雪止。

初七日乙酉雨。作楚萍傳。發開弔訃帖。

初八日丙戌雨。瑞積及董茲全范逢聖來。作范孺人墓記。又作君實公馮孺人吳孺人及楚萍繼室馬氏公

榮配胡氏姜劉氏傳。是日琨璉試于府。夜召道士接范孺人煞。

初九日丁亥 陰雨。治墓磚。修譜。屬石公至團山看路。夜風。

初十日戊子 霽。范孺人二七。董茲全召僧作佛事。爲人書。夜寒甚。冰。是日遣琮迎璞于金壇。

十一日己丑 晴。寒甚。支河冰。范逢聖及瑞楨辭還。

十二日庚寅 晴。寒甚。自鎮江至杭州官河冰。屬瑩木書范孺人墓記于碑。拜求李殿公題主。

十三日辛卯 晴。朱若宿致祭。范逢聖瑞楨及琮皆以河冰還。

十四日壬辰 晴。懋家譜。遣石公陪董茲全入山破土。夜宴司喪者。

十五日癸巳 晴。開弔。至者五十九起。是日巳時破土。

十六日甲午 晴。開弔。至者七十九起。

十七日乙未 晴。開弔。至者八十八起。合計共二百二十七起。謝中立來。夜坐。率子姪舉哀。

十八日丙申 陰。霧。卯時祭。發引。更餘至團山。

十九日丁酉 雨中登山。闕壽壙。頗溫暖。巳時葬。定向者陳定九。題主者李殿公也。申時封壙。捧主

還。二鼓至。家祭。祔主 袁淑人等。是日第三孫殤。

二十日戊戌 雨。謝李殿公陳定九預祭 府君忌辰。

二十一日己亥晴。同鑄耕及劉氏妹率子姪覆墓。疾不寐。是日董茲全范逢聖及瑞楨辭還。各餽以贐。  
十二月二十二日庚子晴。治裝。姜熙文來補弔。餽之。夜爲人書聯。以酒米炭金腿酬李殿公。

二十三日辛丑晴。謝孝。

二十四日壬寅晴。范孺人四七祭。陳履之屬朱謹安致安家銀二百五十兩。謝孝。致司喪劉補過劉正則劉蘊書吳子益楊鶴竹炭儀。

二十五日癸卯陰。謝孝。夜雨。

二十六日甲辰霽。命璧代祭值年諸神。謝孝。得譚書兩札。

二十七日乙巳陰。送朱孺人及琬兒葬。

二十八日丙午晴。得費紫蘅札。陳履之來。

二十九日丁未晴。過陳履之朱謹安王茲來。顧夫人趙貢三金來執贄。授以筆法。何岷瞻來。夜履之屬謹安致路費百三十金。及寄貴州食物。爲人書聯幅。

三十日戊申陰雨。過何岷瞻。不值。值何必友于途。預祭。范孺人五七。夜懸。高曾祖考畫像。墨衰以祭。而令琮珩等各祭其父母于室。分歷歲錢。作題高念祖竹林書屏圍。

附記

楊子日記一冊。係楊大瓢手稿。凡七十八葉。每半葉八行行土十字。從楊氏後人借得。因託人錄得副本。原本每葉後半第一日上皆系以月。今抄本仍之。書面題楊子日記。有印二。朱文曰赤泉後裔。白文曰鐵函齋。卷末白文印曰漢太尉伯起公五十二世孫。所記為康熙四十六年丁亥一年間事。大瓢時年六十二歲。事多瑣屑。但亦有可資考證者。如記與方靈皋往還事。即其一也。民國癸未四月廿日。知堂記。

李釋戡主編 錢仲聯主編 學海月刊第一卷第二冊要目

釋易卦反覆相配	沈曾植遺著
毛詩序駁議(續)	夏敬觀
許書幹支建首形義正譌	楊沂孫遺著
史記律書釋文	冒廣生
知止齋讀史劄記(續)	知止齋主
紺菴題跋(續)	譚延闓遺著
曾文正公集外文(續)	曾國藩遺著
海日樓詩注(續)	錢萼孫

每冊售價壹百元

發行處

南京三步兩橋四之四號學海月刊社



# 蓴鄉詩鈔

錢塘張上蘇泚蓴

## 序

一行作吏。無在非雀鼠之湯。千里事人。誰令製鴛鴦之錦。斯情可慨。自古而然。迺者雨膏在前。風流未歇。河陽有樹。手植新陰。彭澤無弦。心娛古調。既戴星以出入。復刻燭以短長。衙鼓相聞。庭花自落。雖則含章積理。才大能勞。要由腸斷魂銷。我生如命。錢塘張侯泚蓴。鐵基世澤。卓犖天資。幼鄰居宅於六橋。長策循良於三輔。宋時古蹟。大好湖山。唐代詞人。半出丞令。方其南窺江水。縱橫入襟帶之間。北伐吳趨。咳唾向齊梁而上。往往大月試屐。長風鼓帆。流連夕陽。搜剔荒雨。亂石故壘。舊碣殘祠。先我百年。亦當憑弔。不可一世。以爲遨遊。字草如蛇。醉書酒樓之壁。士多於鯽。走避寺僧之茶。獨至遇有心人。作不夜聚。融飛色舞。顧寶刀之陸離。酒影花枝。撫金杯而駸駸。則又未嘗不推茲懷抱。罄此纏綿。召碧簫爲不盡之音。指紅豆爲相思之物也。迨夫振衣海岱。攬轡滹沱。過燕昭市駿之臺。續錢起盧鵲之咏。當年游釣。固騎驢居士之鄉。此日幃帷。儼射虎將軍之地。陶潛不屑。雖云辱在風塵。原憲曾爲。亦且歌成金石。况今日者。瘡痍滿目。痼疾乃身。人懷麥穗之謳。時有桑林之旱。禹稷平世。必則思猶己飢。敦厚仁人。正賴深於詩教。賢者憫流民之什。方用咨嗟。大夫賦行役之勞。

不無餘嘆。授政而遠。吾知其必有以焉。爲心之聲。君殆有不徒作也。僕十年東海。殊愧泥封。五日西湖。曾經珂里。回頭笠緞。未忘君子之鄉。息影門閭。亦在部民之列。猥承青睞。引爲素心。伸展琳琅。如瞻桃李。徘徊瓊玖。敢弁芻蕘。嗟嗟。並世多才。悵詞科之久廢。知音有幾。但癖病之相憐。歌有思而泣有懷。誰能遣此。樂不淫而哀不怨。亦復何求。苟索名臣於才子之門。豈至勛業爲文章所掩。雄心萬族。勿言處鸚鵡籠中。抗手千秋。何必在鳳凰池上。豐潤趙國華拜序。

跋

夫著雄渾奇麗。哀感頑豔。時出入於唐代三李。而於長吉尤近。故一洗乾嘉習派。不爲所囿。而能獨標風格。眞異才也。集中長歌。如登岱。謁項王墓。蓬萊閣觀日。酒樓題壁。夢游香海吟。題塞垣集等作。奇氣鬱勃。光怪陸離。追蹤太白。不特貌似。而神亦似之。又秋夢圖。冶游曲。隋宮古鏡歌。苦寒行。銅雀硯歌。懷儂曲。乞巧篇。擬樂府。無題等作。直入義山昌谷之室。七律詠古諸作。與國朝梅村阮亭爲近。雖不名一家。要亦當今之能手也。辛卯享月。梁溪愚姪張葢拜讀。并識。

題詞

吾家平子才最奇。風骨卓犖天人姿。十年作宦寄邊邑。相逢示我囊中詩。天生崛強一枝筆。揮灑八極何淋漓。乾坤剝刷出幽怪。窮荒雁塞煩搜披。謫仙已往長吉死。仙語鬼語無人知。東登秦岱觀日出。扶桑

燒燭紅玻璃。潮靈鼓瑟山鬼拜。金支翠蕤光陸離。酒酣擲筆蛟龍護。恍見蕙怪出沒波中嬉。蓬萊閣中發長嘯。馮夷海若來相窺。天公駢作勾漏令。（用集中句）至今笑煞東方兒。不如移家香雪中住。扁舟好與梅花期。我攜惠泉山中之美酒。洞窳林屋一帶相追隨。辛卯辜月。梁溪愚姪蓉泚張鑿呈稿。

尊鄉詩鈔

謁長陵

肅清沙漠制專征。燕隊皇孫羽翼成。一代雄姿符太祖。千秋英魄享神京。北遷不盡遺民泣。南內虛傳老佛迎。一自輶轅榆木返。茂陵風雨作秋聲。

穹碑昂首接紅門。禾黍高低傍寢園。俯視幽營羣廟拱。中開天壽一峯尊。（陵在天壽山中峯下）削藩痛悞諸儒計。靖難終慚帝子魂。留得橋山弓劍在。九原長念聖朝恩。

兀兀松柏對斜曛。隔斷軍都大漠雲。自昔蛟螭蟠地市。至今狐魅避碑文。祠官無復司香使。翁仲難言破斧勳。一樣銅駝泣桑海。冬青杜宇豈堪聞。

黃瓦飄殘鐵鳳飛。永安城外露霏霏。孝陵風木無消息。宮井香禱半是非。仙仗森嚴龍去後。神亭灌莽雁來稀。時當漢臘遺臣祭。愁絕江南一布衣。（謂亭林先生。）

謁蘇武祠（在樂亭縣鏡）

衛霍功高各賜纁。白頭誰似故將軍。昔年旣幕圍邊雪。今日衣冠拂漢雲。絕域有書傳雁足。平沙無草見羝羣。李陵攜手河梁句。只恐開緘不忍聞。

北平謁李將軍廟

東道馳驅昔戰場。北平遺廟亦蒼涼。盧龍月苦靈旗黑。射虎山高落木黃。秦漢以還邊事急。祖孫無命將門荒。藍田中酒歸來日。郭蔡飛騰出輩行。

題龍松岑長城飲馬圖

犖磣聲中策騎前。雙厓斷處響吟鞭。盤從石窟疑無路。踏到冰沙別有天。柳峪雲高峯寂寂。桑乾源束水濺濺。短衣待製黃鸞曲。薄暮弓鳴嶺外絃。使君匹馬過燕然。紫劃邊牆一綫連。遷客著書悲壯志。長城落日眺荒煙。漢文有道開寬網。張武何曾愛賂錢。贏得才名傳吐谷。好搜地志入新編。

吳門夜泊

十年不見茂陵書。霜冷楓橋木葉疎。越客野航微酒後。吳娘水閣上燈初。秋風箏柱停金雁。寒月菰塘葬玉魚。回首少年歌舞地。那堪重問舊人居。

孤山小青墓

二分明月負前盟。妬婦津頭風雨聲。如此名山宜葬玉。無端春水竟干卿。題碑湖上留佳傳。薄命人間莫再生。若訴幽衷林處士。梅花淒絕不勝情。

題蘇小墓

三年不到錢唐路。每到錢唐一弔君。無復香車來繡陌。至今芳草妬羅裙。蘼蕪南國留殘塚。松柏西陵入亂雲。隄外桃花堤上柳。蘇家往事總斜曛。

江上雜味

昔來未飲中冷水。此去遙思枯木堂。江海波濤空日夜。楚吳天地自青蒼。紛紛割據英雄夢。歷歷帆檣過客忙。最愛西風漁唱晚。月明燈火見丹陽。

魚龍怪氣走縱橫。黃鶴山圍鐵甕城。六代風煙銘石壁。五州鎖鑰枕江聲。樓船夜嘯南徐市。畫角秋嚴北府兵。遙向佛狸祠下過。神旗社鼓舊連營。

易水送荆卿處

燕臺筑冷黯風雲。痛惜田光薦使君。匕首但知酬太子。囊頭先已負將軍。衣冠涕泣聲皆徹。杯酒蒼涼日漸曛。千載易河嗚咽水。臨歧未遣狗屠聞。

居庸懷古（用亭林韻）

險如蜀道上青天。峽裏彈琴石倒懸。自昔軍都稱納款。(居庸亦名軍都關。魏書。杜洛周反燕州。敕都督元潭。西至軍都。北從盧龍塞。據險以杜賊出入。又謂納款關。)祇今夏口失防邊。(居庸關南口有城。南北二門。魏書謂丁口。北齊書謂之夏口。元史始稱南口。)谷中金鼓從空落。關內旌旗不敢前。(金之亡也。冶鐵銅重門。布鹿角蒺藜百餘里。守以精銳。元太祖問計。札八兒曰。從此而北。黑樹林中。有問道。騎行銜枚以出。終夕可至。太祖乃令札八兒輕騎前導。直趨南口。金鼓之聲。若自天下。金人遂潰。)太息西來羣盜弄。十三陵樹變烽煙。(李自成由懷來入居庸。薄都下。陵樹皆焚毀。)龍虎臺高瞰大荒。(元史。擴廓帖木兒遣將白鎖住。以萬騎衛京師。駐龍虎臺。)譙樓終古陣雲黃。野狐曾見變輿入。(英宗復辟。由野狐嶺入關。)真獸寒鳴嶺道長。(水經注。謂曉禽暮獸。寒鳴相和。羈官游子。聆之者莫不傷思者也。)隆鎮軍容空赫赫。(皇慶元年。改隆鎮衛親軍。都指揮使司千戶屬焉。濕餘河水下湯湯。(濕餘河出自居庸。南流出關。謂之下口。)我朝萬里猶庭戶。出塞車書走白狼。

謁岱廟

遙參門道拱崔巍。青帝當陽寶殿開。萬物胚胎天地始。八方風雨鬼神來。龍蛇怒攫秦皇碣。荆棘斜生漢武臺。七十二君封禪草。文章終古馬卿才。

俠少年

身帶吳鉤縮錦絲。將軍帳下有奇兒。橫鞭醉入青蛾館。挾彈潛行黑帝祠。公子門庭長缺滿。故人肝膽寶刀知。五陵結客千金去。爭唱銅琶鐵版詞。

### 五人墓

名流鈎黨赭衣冠。奮袂鋤奸世所難。已斂男錢封義骨。誰鎔盜鐵鑄閹官。茄花滿地飛冤雪。薜草當門掩暮寒。死傍要離荒塚近。橫塘過客奠椒蘭。  
合澗橋邊聽細流。巖衣薜荔小亭幽。水仙來獻瑤瑤賦。山鬼都含翡翠愁。靈境不隨蒼狗幻。歌羣擬挾白猿游。老僧揖客留茶語。一卷楞嚴伴佛樓。

### 冬柳

無復柔條縮玉塘。細腰宮冷怨襄王。烏啼別苑頭全白。馬踏層冰葉早黃。絮滿謝家爭詠雪。樹依陶宅醉吟霜。江潭搖落今如此。莫畫眉痕鬪晚粧。  
昔年張緒擅丰神。歲晚江湖白髮新。野店酒旗迷舊路。玉關羌笛本無春。絕憐瀟岸橋邊客。不似靈和殿裏人。一樣娉婷驚老大。天寒猶未悔風塵。

### 過海淀

誰見流鶯出上陽。鞭絲得得近宮牆。渚蓮零落紅衣老。苑樹參差翠蓋長。無復甘泉迴玉輦。別開瀛海奉

瑤觴。小臣未識驪山路。立馬唏噓問道傍。

景泰廢陵

土木變輿去竟遙。誰扶日月奠重霄。肅宗自合承唐統。安帝何緣祚晉朝。東市麻衣空駿馬。北門管鑰痛鴟鴞。荒陵莫比泉鳩里。復辟君臣墓草凋。

天下大師墓

何處西山老佛墳。不封不樹託遺聞。百年國史傳疑案。一代人心繫故君。骨肉可憐征戰苦。河山又見劫灰焚。長陵蔓草茸茸碧。隔斷昌平日暮雲。

三台山于忠肅公墓

故鄉祠廟故山墳。來拜三台日暮雲。李泌相才能治國。元暉心事本迎君。豈知鐘鼓中興業。竟有圭璋復辟勳。太息兩朝冤少保。棲霞松柏共斜曛。

漢南秋柳（用漁洋韻。并序。）

昔漁洋山人寄情宮怨。談天寶之淒涼。僕則浪跡雲游。感河橋之憔悴。金迷紙醉。楚客樓高。烏角紅鹽。吳娘調苦。類效擊之荷鴨。等衰響於齊蠅。問洞口之桃花。早無漁父。染江干之竹淚。定有靈均。



旗亭何處繫吟魂。千里風煙接楚門。聯臂尙歌江上曲。畫眉羞見鏡中痕。軍容無復陶公壘。碣館難尋沈女村。弔罷渚宮三十六。梅花吹笛與君論。

十年青鬢染成霜。攀盡柔條過野塘。仙子蘭若迷極浦。美人簫管寄殘箱。蝦蟆陵下多思婦。鸚鵡洲邊怨故王。生長長于君未識。而今家近白鞵坊。

飄零不比舞時衣。燕子春燈事盡非。破額山頭人去後。細腰宮裏夢來稀。郢中詞客皆能賦。吳苑啼鴉強自飛。唱到人間可憐曲。大隄相送莫相違。

倚遍章臺我見憐。樹猶如此劫秋煙。風塵驛路還嘶馬。燈火深閨欲寄綿。花月何關兒女恨。江山已老戰爭年。征裘壓損封侯骨。莫遣橫陳大道邊。

### 北固山

蕭公北顧此名樓。坐挹雄圖百二州。楚火西沿瓜步出。吳帆東下蒜山浮。大兒古有孔文舉。生子今無孫仲謀。明日釣娘隄上去。青楓紅蓼不勝秋。

### 無題

繫馬垂楊小杜家。自矜約素謝鉛華。可憐荷葉中宵鏡。不照菖蒲昨夜花。團扇朝雲空粉黛。畫簾香雨鎖箏琶。人間別有銷魂地。亞字闌干韻字紗。

未有珍珠慰寂寥。香心琴尾一般焦。江南有樹生紅豆。天上何人召碧簫。秋藥欄深扶豔骨。春羹門閉滯歸潮。無端聽鼓應官去。半幅吳淞快剪刀。

江干僧見柳如絲。縷雪團香筆一枝。茗椀碧涼晨讀畫。燈花紅瘦夜填詞。已無置酒橫琴地。况值哀蟬落葉時。從此畫樓秋不管。天邊招燕恐難知。

塵海回頭憶碧虛。暫因小謫感離居。瓊田秋冷多鴻雁。翠水波寒少鯉魚。芍藥年華無恙否。芙蓉消息近何如。欲將心事題花葉。遠寄層城閬苑書。

題兩當軒集後

太行西去嶽雲橫。手把芙蓉上玉京。只有巨卿呼死友。絕憐李賀負狂名。平生酒筑悲歌氣。半入河汾變徵聲。君本人間暫遊戲。月明吹破嶺頭笙。

吳會英才七子奇。憐君辛苦獨吟詩。長安憔悴青衫色。采石流傳白袷詞。綺語未刪繁主簿。長裾遍揖鄭當時。如何夙負黃童譽。吐盡春蠶絕命絲。

北山

北高峯不見。一角露山樓。淺草下溪女。斷萍棲野鷗。山空黃葉富。僧去白雲留。寂寂晚陰落。夕陽移釣舟。

留下

西溪且留下。禪窟得奇緣。往事花成海。生涯藕作田。一帘茶市酒。三月笋租船。勝代幽人宅。梅根訪古泉。

溪聲喧足底。危石渡濺濺。落日在楊柳。春風聞杜鵑。漸深逢古衲。相與人寒煙。且酌山中釀。松顛閣下眠。

留別北山

滿湖秋水瑟。游子去鄉時。近墓先瞻涕。攀條古別離。酒難今夕醉。雲愛出山遲。與爾堅相約。青松莫負期。

吳汀步月

蘋風吹半灣。夜色自幽飲。市遠柝聲小。雙橋墮月影。橋南雜燈火。隱約隔人境。蹤之蟲語絮。令我秋懷緊。滿船睡聲起。涼蟾更修整。依稀似有人。疏窗剪刀冷。

游靈隱寺。憩冷泉亭。并至飛來峯。

在山泉本清。冷抱靈隱寺。西竺小鷲峯。何時飛到此。幾朵青蓮開。松毛如雨墜。層層嵐氣濕。面面石髮膩。息羽聽經聲。默悟西來意。樵磴古苔滑。春衫染寒翠。斷雲扶樹直。乳竇滴花細。石佛鑿何年。

閒話南朝事。仙人一局棋。呼猿蹟尤異。坐久夕陽影。來照題名字。溪鳥破煙飛。門外響松吹。

鳳凰山懷古

樓閣參差倚上郡。洗粧池畔黯平蕪。千秋侍宴劉妃曲。一角殘山馬遠圖。雪窖冰天忘北狩。荷花桂子老西湖。傷心獨有騎驢客。忍見深宮放鴿娛。  
天水蒼涼一碧消。影魚香骨夢蕭條。木波幽怨歸僧懺。桑海遺魂付客招。隔樹紅鴉啼欲碎。過江白雁語猶驕。諸陵已燬冬青死。惟有錢塘咽暮潮。

梅花嶺謁史閣部墓

江淮落日戍旗孤。一木誰將廣廈扶。東閣鞢鞞牽大老。北門管鑰啓諸奴。壇場半是桓元子。波浪空悲陸秀夫。四鎮蟲沙成浩劫。艱難仗節到公無。

白馬清流弔國殤。北書辭氣尙堂堂。夷吾自灑新亭淚。江總仍飛曲院觴。生比黑潭傳信國。死留碧血見高皇。蜀岡庾嶺神來往。兩地梅花土亦香。

蕪城春恨

疲驢踏遍落花泥。明月扁舟又竹西。殘夜青燈挑舊夢。銷魂紅袖半無題。棠梨寒食樊川路。楊柳新煙大業隄。昔日蕭郎曾到此。玉鈎斜畔暮雲低。

龍泉寺遇天台僧

故國三千里。雲游尚未還。相逢燕市裏。言下沃州山。洗鉢圖禪悅。談詩破客顏。茅庵讀書處。應在石梁間。

送何梅客入黃山

黃海浮雲起。知君攜素琴。幽人何所往。芳草自然深。靈運真山賊。嵇生養道心。天都鸞鳳侶。應聽嶺頭音。

北河謁楊忠愍公祠

諫草亭邊正氣留。墓門斜日掩松楸。孤臣北寺霜披髮。宰相南冠雪滿頭。自昔龍逢曾痛哭。至今馬市入邊愁。莫言地下無知己。風義相師有鹿周。（謂鹿忠節周忠介。）

謁明盧忠烈公墓

紫荆關外邊塵生。尙方賜劍趨北京。居庸形勢天下險。急揮三將馳兼程。羽箭倉皇亂如雨。西山羣盜夜叉舞。疆臣闡弱守將驕。眼見咸陽俱焦土。惟公忠勇泣鬼神。荆襄昔鍾夜不驚。養兵能得人死力。中原恃之如長城。淮泗成墟血盈野。詔書討賊賊不下。遠師分擊賊東西。士卒恆饑食宰馬。涂州一捷震鼓鼙。威名何止驚兒啼。不遣長驅扼關隴。賊人焉得窺河西。驅賊縱賊戰不已。公應聞此投冠起。同時宿將

有何人。甯南恃寵宗龍死。曠代鬚眉青史垂。南山樵牧識殘碑。秋風石馬無人問。多少英雄地下悲。

題明倪文正公畫雙松長軸

長風捲紙濤聲粗。蚪枝勁折龍髯孤。墨痕慘澹染碧血。畫筆再拜倪尙書。尙書枋國崇禎初。內黨外寇顛誰扶。大廈將傾棟材少。沉憂早已悲蒼梧。尙書畫松如畫人。礫礪節目盤枯鱗。天荒地老歲云暮。稜稜勁骨無冬春。尙書寫松卽寫照。黛色蒼茫古容貌。烈皇殉國公殉主。弓劍淒涼九原弔。絹素流傳二百年。景山花落埋寒煙。畫中黯黯頹雲暮。亂鴉啼斷冬青樹。

聞金陵報捷。喜而作此。

火急落星旄。江聲走賊濠。勢窮名將力。恩重戰功高。一氣收天險。千軍換錦袍。楚歌聞四面。白骨幾蓬蒿。

十載紅羊劫。深宮露布馳。至今江水上。重見漢官儀。符璽歸天府。星辰拱將旗。功名麟閣畫。鄧禹笑人遲。

金閭樂府

水上嬉。榜橫塘。蘭膏桂燭夜未央。主人傳命酒。低鬟陳百觴。水上嬉。豔陽節。一片香塵舞迴雪。柘枝唱罷蕉葉稀。一聲長笛湘裙裂。君不見真娘墓前舊鼙鼓。鴛鴦飄煙尙焦土。

河畔塚。何崔巍。賊騎出。聲如雷。稚女哀啼阿娘死。斷釵委地埋荒苔。河畔塚。半狐穴。露草萋萋鬼燈滅。但見枝頭杜鵑血。昔年白骨粲。今日生人歸。生人歸。翠將爲園扉。

由三天竺歸。夜止山家。

秦亭三里及五里。百道飛泉噴足底。人聲鳥聲並竹聲。人鳥爭入竹門裏。乃由天竺寺。更攀九里松。峯峯有松松不同。一峯南來一峯去。峯峯之石皆可語。山鬼新披薜荔衣。山花散作芙蓉雨。寺門刻石千佛尊。白毫妙相生雲根。山家止宿悄無夢。夜半野狐來叩門。

顧亭林小像

一代遺民錄。千秋王佐才。管甯浮海去。伏勝授經來。竹帛平生志。衣冠故國哀。可憐秦火後。圖畫仰丰裁。

吳梅村故里

西風樵牧下。指點是梅村。詩卷長終古。滄桑不可論。空山留短碣。破屋感清門。一派婁江水。誰招地下魂。

蜀山書院懷古（昔東坡乞居常州。接席與蔣魏公談陽羨山水之勝。遂有買田築宅之意。）  
未捧炎荒檄。瓊林入宴初。及聞樓閣語。頓覺宦情疏。石銚煎茶具。山齋種橘書。至今聯白社。指點草

堂居。

拓湖封草去。魚鳥識公游。自昔居杭日。何無宅謀。墓仍歸穎上。山豈似眉州。我亦探幽往。甘泉聽細流。（地有甘泉碑。）

秋夜聽曲

曲房青豆華燈明。芙蓉霜落秋潮生。十三鈿柱金雁橫。繁音急雨疑秦箏。銅槽宛轉冰絃清。流珠瀉作銀河聲。脩蛾出繭織桂輕。宮移調轉難爲情。難爲情。復難說。長相思。久離別。大別山高湘水闊。七十二峯劃空碧。金井鴉啼玉階雪。菱絲紅老蘭煙歇。離離北斗夜向闌。迴身斂袖玉指寒。錦囊收拾銀甲卸。同心未遇休輕彈。

北征留別

我本落拓人。十載蓬窗裏。故鄉無一椽。亂離數遷徙。忽然得徵官。相去三千里。謁墓告父母。出門無妻子。古人惜別心。生離不如死。昆季送我行。絮語淚不止。親朋送我行。目盼征帆起。是時秋氣深。菰蘆滿煙水。遙揖岸上人。君等請歸矣。攬輿向燕郊。艱難從此始。

別先隴

吾宗十七世。瓜瓞本不繁。詩書爲世澤。門第知淵源。墓前五松。矯立爭軒軒。下有守墓人。剝啄門



無嘖。春秋有佳節。祭掃留鄉園。無端宦遠方。此事誠難言。松楸幸無恙。泉下心憂煩。獨念此孤子。南帆向北轅。恐傷先人意。忍淚辭邱原。

### 山行雜詩

蒼蒼楓樹林。葉落吹西嶺。松寒人語空。雲乾古泉冷。蕭條暮天氣。日斜懸馬影。露草黃一壇。土花紅半井。徒御既相戒。陣鴻行遠警。寥寥天地心。窮秋一深省。

秋夜淒以清。野寺鐘聲歇。忽聽荒鷄鳴。天光慘將白。殘月挂東嶺。衰草沒行跡。山店喚開門。瓦燈耿虛壁。階除竄蒼鼠。墮果欣可拾。應念萬山中。誰來此孤客。

百步之內有嘉木。勁節森森拜松竹。重其先拔俗。一林之內有飛翮。鳥鵲相賀于堂。吾重其不出鄉。一身之事。骨肉不詳。欲告我友。又苦天一方。百年之中。半不居里。惟老馬追隨。見我輒喜。

孤村三兩家。疏煙散幽篠。樵夫不下山。羣羊踏秋草。

夜深狐火青。來就岡頭歇。草寺荒無鐘。虛廊響明月。

榛莽天濛濛。懶雲呼不起。深林虎跡多。下飲青潭水。

誰唱刀環曲。征人竟未回。至今盤馬路。不見鬪鷄臺。

### 東阿謁項王墓

不殺沛公。不都關中。不渡江東。三以天下讓。大王真重瞳。奈何王身分五體。王頭走千里。虞兮虞兮帳前死。蕪葬濠州長已矣。我從彭城來。狂歡戲馬臺。東阿拜王墓。願王心弗哀。不見生當烹。死當醢。功狗誰。骨安在。牧羊兒入秦陵空。牧牛兒入漢陵毀。火引青墟燒寶衣。一樣銅駝泣桑海。穀城古碣經千霜。不書魯公書楚王。王之始封如故鄉。東走鉅鹿。西馳芒碭。一坏亦具拔山勢。四郊風起雲飛揚。

登岱

我來泰郊馬首東。齊州九點青煙中。巉巖都作攫人勢。磨牙臥道如老熊。丈人峯頭尊莫崇。胚胎萬物淩蒼穹。魑魅潛形百怪避。蒼官夜宿青琳宮。御帳坪前聯羽幢。滴巖石乳垂玲瓏。磨崖大字刻其上。霹靂手筆留神功。天門一綫蠶鳧叢。危梯鐵索開鬼工。怪松拔出蔽天黑。頃刻萬象奔濤洪。鱗張鬣縮爪入肉。千劫避過雷火攻。忽然特地吹腥風。沙深寸許有虎蹤。夜搖星斗比瓜大。往來仙樂聞虛空。螺旋燈折不知幾萬重。仙房曲曲生芙蓉。白雲膚寸疊如絮。綠毛羽客天衣縫。回視神霄火焰勢鬱葱。傲來怒目爭其雄。及至身臨最高處。羣山俯伏如兒童。黃花棧險修蛇通。洗頭玉女水一泓。丁香紫結春溶溶。內孕靈氣鬢鬢鬆。上有古木逆飛之孤鶴。下有幽潭瀆沫之潛龍。前見鯨魚捧日海底出。火雲燒遍扶桑紅。後見陰崖尙留太始雪。冰花六月難消融。山中朝暮景不同。如讀奇書不敢熟。一喝使我三日聾。惜哉不得登日峯。特恐山靈相挪揄。笑我風塵容。停鞭得得催花驄。歸來兩眼青濛濛。

登蓬萊閣觀日出。放歌。

車輪冉冉乘火雲。赤標一道衝海門。流霞生枝護寶色。太空倒植珊瑚根。燭龍光怪萬象有。大力羲娥負之走。扶桑一炬夸父逃。十萬靈犀幻蒼狗。縹緲波斯國。頃刻金銀臺。飛鳥啣出具花紫。魍魎捧鏡珠宮開。安期羨門猶在哉。試與話滄桑之小劫。叩青琳而徘徊。花前痛飲三百杯。侍香郭密皆驚猜。玉山頽倒不自覺。一跌翻落黃塵埃。天公罰作勾漏令。新向長安賣藥回。東方小兒走相語。神仙昨日游蓬萊。

游丹崖山天后宮

修蛇赴壑路迢迢。寶蓋珠幢鑠寂寥。蘭橈宮壇羣帝近。桂旗風雨百靈朝。蛟門夜靜聞仙樂。鳥道晴懸入暮樵。細燕神香酬海若。雲中鸞鶴許相招。

景山懷古

羣盜如毛起。烽煙慘四方。捐軀酬赤子。披髮見高皇。中貴攀髯去。通天乞表忙。隴西鸚鵡在。何處問君王。

萬歲山前樹。紅梨冷夕陽。宮闈空漠漠。溝水自泱泱。殿角蒼鷹擊。江湖白雁翔。本朝恩禮重。弓劍有輝光。

北平行

北平爲古郡。驛馬秋山裏。浮雲蔽天地。隱隱雁聲起。李廣竟不侯。夷齊竟不死。巍巍清風臺。寒蘆湛  
煙水。蒼蒼射虎石。悲風捲荒壘。釣者不得魚。豔說滌河鯉。羣山翼都門。終日青在几。征夫盡出關。  
宵行自茲始。東嶺拾枯松。西澗打榛子。

塞上秋草（和龍松琴韻）

昨夜西風倍可憐。九邊衰草思纏綿。穴中狐兔空悲跳。石畔牛羊任臥眠。野燒紅連陰積樹。亂山青斷數  
家煙。窮途不少楊朱泣。灑向龍堆路幾千。

萋萋極目成樓昏。畫角聲中暮掩門。瘦馬冷嘶金勒色。嗁蜚招入玉關魂。絕憐榆塞新泥跡。無復槐廬舊  
屐痕。我憶采蘼湖上曲。家山回首更難言。

黃雲漠漠捲塵埃。詞賦江關庾信哀。幸有因緣鴻雪印。無邊蕭瑟雁沙來。新歌青塚明妃曲。誰送黃金蔡  
女回。萬里窮荒肥苜蓿。空傳市駿剩高臺。

已是哀蟬落葉時。吟蟲相對吐秋絲。蓬蒿豈合詩人老。桂樹頻添故國思。昔日腰圍痕未減。早衰心事鬢  
先知。青袍莫謂無顏色。寄語春風好護持。

秋燕

江南塞北雨如塵。無扇飄零惜此身。去日盧家猶故壘。當年李嶠是才人。舊情許帶紅襟字。離緒難言白

社春。莫謂關河太蕭瑟。烏衣門第未全貧。

### 乞巧篇

客有膠東之酸棗。冀北之肥桃。湘君之瑤瑟。文君之洞簫。庭前列嘉果。以期天孫壽。天孫不來秋螢老。歲歲芙蓉變衰草。穿針樓上都嬋娟。吳姬越女羅衣鮮。綉宮桂燭守紅死。豈爲區區貨聘錢。鯉魚尾美不許食。漢家營在祁連北。誰云奪我燕支山。使我婦女無顏色。遼西一夜生秋涼。低頭明月憶故鄉。故鄉兒女樂無比。鬢師眉匠開鏡箱。情絲寸寸蜘蛛結。洗手花叢未消歇。湖上曾邀油壁車。帳紗一角飛殘月。射虎山高鶴信遲。爲傳天上是佳期。天風吹送海童至。竟被人間私語知。

### 擣衣曲

今夕秋月明。月華散樹楹。螢飛玉階院。雁度銀沙城。誰家擣衣女。攜伴出中庭。輾轡出金井。寒漿上銅瓶。細腰瓊瑰杵。万花白石砧。砧清透寒響。杵亂自成聲。聲隨別淚下。響逐酸風生。啞啞夜鳥起。迢迢牽牛橫。牽牛指銀漢。耿耿夜將半。連理檢相複。曲折整裙襜。幅幅細花雜。斑斑清淚滿。心苦聲轉急。腕弱手更換。袖長風縷濕。力重蟲簪顛。長笛送高秋。垂楊大道樓。妾家住河北。良人戍隴頭。浮雲忝別恨。澗水煎離憂。憂來心切切。憂盡三載別。八月寒上陰。九月邊關雪。但有春前寒。那復秋後熱。舊情紈扇棄。新愁翠眉益。虬漏夜如何。窗紗月影過。露下柳絲重。霜飛木葉波。營門抱畫戟。

玉帳枕瑠戈。竟床長簾冷。應復夢交河。

冶遊曲（擬長吉體）

秋千舞罷春腰軟。短陌柔桑歌緩緩。弄珠破粉貼宮黃。一國秦衣五更轉。夜雨鴛鴦三十六。蜀枕屏風夢中剪。忽聽門外走輕雷。三尺游絲遮露眼。越釵夜夜照西施。九州如被香魂淺。

銅雀硯歌

鄴都甲帳春溶溶。美人夜半雙淚紅。西陵石馬踏波壞。無復雄心江水東。英雄未死邯鄲舞。寶瑟飄煙日將曙。奇香繡履別攜人。不見三臺斷腸處。鴛鴦燒裂成紅鱗。百尺香泥埋古春。不肯斜飛入漳水。月下誰聞歌舞人。幽宮深瓦飛秋蝶。淘洗風沙復光澤。殺罷河邊唱上天。高家又見香姜色。割取雲腴膩笏光。市間奇貨如琳琅。老瞞地下應長笑。笑爾人間贗鼎藏。

題秋夢圖

金井梧桐玉階濕。秋缸自明蟾蜍蟄。幽輝扶上曝衣樓。薄暝初銜淚痕入。秋衾宛轉珊瑚涼。疏檣漏月照額黃。短漏沉沉夢難破。魂小還從竹梢墮。

苦寒行

簞葉吹殘月輪黑。凍雞三唱疎星沒。孤燈粘壁青燐燐。照見車鈴響城缺。堠兵蠟縮草間出。賣漿乞火渡

頭歌。土花裂作蟹爪紋。山脊稜稜露榛櫚。驄馬夜嘶振毛髮。盲風中挾蚩尤骨。陰山壯土金甲坼。酒壚生飲黃羊血。何若田家土埜溫。女兒顏似唐花色。

送嚴蝶周遠桐鄉

共爾長安道。秋風市駿臺。故人憐此別。吾子慎將來。古史無文苑。名山有劫灰。莫言同調少。湖海合生才。

酒樓題壁

勇兒束書不得意。便當遠從寶車騎。有銘去勒燕然山。買盡人間不平字。長安落葉金城秋。夜向天橋尋酒樓。漸離筑冷狗屠死。解衣礮礮輕諸侯。我憶當年陳伯玉。都市碎琴歌當哭。自惜生平文百軸。更有天津橋頭董糟邱。與酣醉脫千金裘。釣鯊海上滄波流。某何爲是棲棲者。眼中之人知己寡。明朝歸逐鴟夷子。不然荷鍤南山下。

劉伶墓

劉伶劉伶進爾一杯酒。酒星下覲蛟龍走。永熙人物酒徒多。不覺狂歌皆敗缶。傷哉稽阮才絕倫。竟以文章死人手。不朝不市亦不友。到此方能傾大斗。負瓢出。荷鍤來。陶家可埋即便埋。沛上小兒起而舞。中山頃刻成蕪菜。吁嗟乎陸生隱具有鴉嘴。晉王座畔半狗尾。人生何處謀斗米。不若逃入醉鄉去。地下

故人揖新鬼。能腐醉骨不腐名。千載酒人摺然起。柴桑居士青蓮李。

題鄭鐵庵陰山躍馬圖

龍沙雪花大于掌。河橋路滑流澌響。五更披起驢羸裘。靴刀鞘首英姿爽。將軍畫戟專城居。紅塵一騎修聘書。知有才人謝記室。北風盼斷狼居胥。君正西行苦寒逼。卷髮奚奴馬前立。馬毛如蝟慘不驕。此時相顧無人色。陰山橫障賀蘭山。磧裏擒生壯士還。青塚草枯燒堠火。黃河冰滿渡征鞍。投鞭一躍過高柳。此是當年射生手。聽罷千人勅勒歌。來傾萬斛葡萄酒。牙兵忽報使君來。將軍喜甚華堂開。頭鵝宴罷各歡笑。匣中寶劍聲如雷。回首旌旗豎城闕。一片荒沙戰場骨。惟有書生膽氣豪。宵來不夢交河卒。漢家衛霍建奇勳。書佐材官皆賜纁。君才磊落遇偏晚。下馬徒書露布文。吐谷床頭有詩卷。子昇以後無其羣。乃今見此鄭使君。

送于漢卿太守入關中

花落江南悔浪游。短衣今復客諸侯。手攀神嶽三華樹。足濯黃河萬里流。倘遇古碑搜漢寢。竟忘歸夢到邗溝。願爲公是先生記。紙盡羊皮筆未休。廣武登臨笑步兵。蕪城一賦早知名。芙蓉仙館開賓榻。楊柳河橋紀客程。名士彈琴招北去。門生吹笛共西征。渭城唱罷何堪在。抵得陽關第四聲。



隋宮古鏡歌

三千殿脚秋螢腐。石畔采菱手相語。君王如此好頭顱。雷塘日暮多風雨。絳仙眉黛尤嫵娟。月觀蒼蒼化碧煙。不壽美人壽黃土。土花爭比瓊花妍。同心夜夜鴛鴦結。玉腕金魚俱銷歇。天生古翠奪臙脂。巧占揚州二分局。青瑩爛繡芙蓉霜。三十六宮飛冷光。賈人奇貨市人笑。送入朱門新嫁娘。

趙飛燕玉印歌

昆刀割雪流春乳。宛轉雙鸞靜無語。胭脂紅暈漢宮春。小印流傳趙宜主。宜主風流舊有名。漢家天子重傾城。平陽歌舞春如海。一顧當筵早日成。嬋娟最得君王意。蛤帳宵明玉顏麗。石華廣袖紫英裙。頃刻六宮傳故事。蛾眉當日正中宮。椒殿香生四壁紅。赤鳳歌中春正好。綠熊席上暖初融。此印氤氳蘊蘭麝。雕鐫小字珍無價。愛護藏宜金屑茵。摩挲裏以香羅藉。精金瓠指幾番拈。雲笈開函起畫奩。樊姬簿中湘碧亞。彭錢書上桂紅鈴。遠條別館迷春宴。歸風送遠留題徧。笑向宮娥署紙多。七寶屏風九華扇。卷髮新妝麗曉霞。更聞女弟擅容華。金釭銜壁流蘇帶。爭羨昭陽第一花。再拜嘉良貴人姊。奏書定亦工文史。蓮枕同心月鏡圓。芳燈照字明如水。亦有當年辭輦人。秋衾獨自掩長門。淒涼一卷東宮賦。殿角蕭條起暗塵。木門零落倉琅朽。赫蹏書字今何有。祇餘片玉暈桃花。仙乎曾綰織纖手。宮闕西京事總非。鳳凰琴斷冷金徽。一函留得藍田壁。莫化斂頭白燕飛。

綠珠玉笛歌

血花沁紅土花碧。一聲入破仙雲裂。千秋古玉口脂香。說是當年綠珠笛。雙角山前汲井華。白州原是舊兒家。明珠十斛猶嫌少。屠老爭看第一花。天生慧質好眉嫵。紅閨手製新翻譜。纖纖玉指按梁州。一片香塵萬花舞。洛下繁華逝水流。齊奴步障眼前收。珊瑚已碎胭脂賤。忍聽啼鴉別畫樓。文箱錦瑟無人護。江湖弟子親攜去。天顏一笑六宮愁。何年玉匣歸陵墓。小劫紅羊有變遷。蘭亭又見出人間。銅駝淚滴鴛鴦瓦。金谷花開玳瑁斑。妓師愛護勞珍襲。換來豈止千金值。莫向樽前奏落梅。老龍夜嘯湘妃泣。

薊城寫望

羣山東望擁千層。異地重陽載酒登。草盡平沙騰櫜馬。城荒晚角下鞞鷹。錦衣宿衛尊都護。禁苑丹青付寺僧。回首成樓沉暮色。九龍王氣拱昭陵。

謝文節古琴歌

先生一去五百年。天荆地棘埋荒煙。衣冠南向仍以此物殉。廣陵之散不復留人間。鐫銘尙有橋亭硯。畢命音沉憫忠寺。此琴幸未遭擊碎。不比西臺竹如意。嗚呼文山之琴有正氣。先生之琴有正聲。此是趙家舊桐梓。激翻海水天爲驚。正氣正聲動危柱。淚灑曹娥向誰訴。零落天涯汪水雲。彈不到六陵風雨冬青樹。

聞道

聞道戈船海氣昏。公然鱷魅走乾坤。丁零萬部窺東徼。甲帳千屯衝北門。已見夜郎成虎落。空勞重譯索烏孫。卽能歲歲輸緡帛。國事如棋未可論。

和龍松琴用昌黎八月十五夜贈張功曹韻

君來塞北辭御河。我將遠踏桑乾波。一日九詣恨不足。蒙君雅意投長歌。勸君謫居莫徒苦。多少黃塵變白雨。九門虎豹關雲高。十三陵下草木號。穹碑昂首立天表。風雷呵護百怪逃。紅牆剝落秋草萎。鷓鴣啼血吹腥臊。昌平山水久耳熟。有客相約登神臯。回首邊塵幾萬里。太息蒼梧帝子死。鼎湖龍去不復還。銀泉山下馬鳴班。古來興廢在邊事。北門買市通諸蠻。我今愧作抱關吏。遇子却在風塵間。承平無事但吟咏。虞臺絕險思窮攀。願君翻作石鼓歌。搜剔遼金冠斗科。胡牀把卷詩更多。人生窮達須由他。有才不遇如君何。

和王鼎臣觀察贈李果仙龍松琴再用昌黎韻

天風夜捲鷲鷲河。木葉未黃水亂波。八月草枯大漠闊。但聞勅勒長城歌。盡道無如邊月苦。金柝敲殘詐秋雨。憑墟不見關門高。飢鷹攫肉萬馬號。忽然狂吟振山谷。鳳鸞驚走蟾蜍逃。左召詩龍右文虎。穹廡不畏秋風驟。驪壇立幟誰健者。才標七發令枚舉。漢水湘江幾千里。渚宮香草何曾死。問君西游何時還。

。謫仙尙逐蓬萊班。酒酣喝月天地變。鄉音隸舌皆南蠻。先生五十不自老。東坡二客周旋間。蒲桃美酒未足道。峽裏好約猿猱攀。偏來此地聽楚歌。悲秋宋玉真同科。天邊吟雁何其多。覆雨翻雲莫怨他。但看今月明如何。

和龍松琴贈言

蝦蟆更裏夜如年。挑盡秋燈各惘然。君自西來瞻戍月。我將東去訪湯泉。長城飲馬催行色。寢樹啼鴉入暮煙。歲晚天崖慎爲客。漢庭終念賈生賢。

喜見河東薛鳳來。征衣拂拭草堂開。風塵倦眼驚奇字。造物何心厄此才。痛飲讀騷箋草木。謫居修業近蓬萊。傳家自有名山席。底用王郎斫地哀。

中秋後一日。聞雁有感。

念爾南征急。徵官滯異鄉。風沙邊塞苦。松菊故園荒。人世盡繒繳。天涯無稻粱。殷郎書咄咄。愁寄兩三行。

題王鼎臣觀察塞垣集

塞雲黃。楚雲白。乘障亭邊荷刀戟。三閭以後生蘭成。千載才人蕩魂魄。去年識君面。今年讀君詩。悲歌斫地無人知。註罷離騷神鬼出。金陀軼事編華詞。(先生方敘回匪始末。)我聞太白流夜郎。東坡謫

嶺海。到處雕搜訴真宰。乾坤清氣亦盜盡。惟有窮荒爲君待。野狐嶺上雲刺天。雕崖山下雪照鏡。從古詩人不能到。使君涉筆生光彩。榆林月黑草已霜。秋風起兮鐵甲涼。斷猿哀啼子規叫。游子極目懷高堂。高堂忽盼王尊馭。新唱弓衣入關去。赦書一日馳百程。鵲舞庭前花解語。峽雨巫雲恣吟眺。正是江山不平處。天生此才必有用。宣室傳呼九門曙。上書投魏闕。莫學窮少陵。蛟龍本非池中物。豈有白壁汚青蠅。賤子碌碌無一能。南游吳越佳山水。爲君先導除榛藤。前擔琴書後擔酒。拾級或可扶而升。狂言四座君毋憎。

題曾壽康贍禪圖。時客戍所。

寒門春霽識君時。坐破蒲團悟未遲。繡佛燈前誰解語。華鬘劫後尙題詞。講居坡老頭將雪。說偈朝雲鬢已絲。絮果蘭因參不透。前生須問戒禪師。

萬松寺

樓閣參天起。蒼茫萬仞環。寒濤疑作雨。秋氣欲離山。鬣古皆龍種。煙深阻鶴還。魏公留劍術。鎮日掩松關。

少林寺

紫蓋峯頭路。鐘聲隱上方。野藤生石塔。山果出宮牆。古佛侵苔綠。癯僧比菜黃。夕陽人影下。未免戀

空翠。

盤山行在

摩題玉藻勝蓬萊。四面雲山景物開。莎草定無銅輦過。巖松曾見翠華來。御溝水冷稀紅葉。曲苑煙沉長碧苔。尙有園官樵牧禁。宮鴉都上最高臺。

盤山僻境

萬重蒼翠生巖腹。樹葉無風自相逐。山根草死聞枯香。碎石馬蹄聲寂寂。飛崖倒捲珠簾雨。青狐嘯月搏沙舞。桃源古洞乍逢人。十月山禽作春語。

由袁家溝度十八盤嶺。至香山。境頗幽僻。

浮巖未數里。村鷄日將午。却怪窮谷裏。人氣此中聚。沿緣數十家。零落亦村隴。丁男拾柴去。老婦守閉戶。煒煒挂一藜。飢色上眉宇。入門何所有。屋角牽蘿補。土鏗藉草茵。豆羹無半甌。山田多惡歲。輟耕皆棄土。安得剪白雲。被塞成絮縷。我聞感此言。好語相慰撫。薄日破青冥。遙天雁聲苦。我行青山口。谿徑已偏窄。及歷十八盤。盤盤皆劣石。高者如升梯。低者如墜澤。殘雪半在林。敗葉亂溝積。征馬盡躊躇。往來惟鳥跡。僕夫汗如雨。舍輿理蠟屐。十步須九憩。徒御相扶掖。長城隔重嶺。終古制華貂。歷代置邊戍。費盡萬夫載。因念盤之中。那是逃秦客。空山少薇蕨。所產松與柏。剪伐亦

殆盡。誰起濤中瘠。人家在何處。鷄犬白雲隔。適逢村女來。蹇驢一鞭策。

荒巖行漸盡。坐觀萬物零。香山有主人。可以爲居停。誰知出門候。爲我開柴扃。短垣修且整。四顧無一隣。養樹得生意。伐木時丁丁。佳城占高壘。雙澗變中泠。松柏發古茂。下有千歲苓。我言山色好。惟有君家青。人在羲皇裏。草堂亦效靈。臨別語主人。不如守一經。

易京行。弔公孫瓚。

燕南垂。趙北際。中央不合大如礪。惟有此中可避世。前臨易河後通遼。積粟繕甲樓櫓高。烏桓健兒避白馬。伯珪當日真人豪。十罪討賊計本疎。界橋一敗無雄圖。當時能殺劉伯安。海內復有袁本初。梯衝舞樓上。鼓角鳴地中。袁氏之衆若神鬼。百樓雖固偏師攻。鐵門堅守居高京。前有強敵期休兵。西山未斷北隰誤。敵師已入三重營。君不見異日袁曹稱大敵。戰鼓無聲官渡赤。幕中亦有陳琳檄。

夢游香海吟

具區三萬六千頃。我所思兮洞庭水。金庭玉柱非人間。靈威祕書藏何處。我身未到夢先至。縹緲莫釐毋乃似。仙人手持綠玉杖。邀坐梅花香雪裏。此身飄然如一鶴。跳入蓬壺五雲起。醒來兀兀坐牀第。尚恍猶言夢中好。却笑山靈太相迫。我宦未成行尙早。不如寄跡在遐荒。閱盡穹廡九邊小。卽論山城現宰官。亦是人生幻影耳。五湖煙水在胸中。他日追隨子皮子。

留別繩庵學士

磨礪蹤跡共邊隅。昨日官書火似符。一去塞垣無別恨。獨憐京兆滯歸途。長沙抗論常憂漢。祕院需才定召蘇。屈指賜環期不遠。爲君除道作前驅。

泰山殘刻十七字。在碧霞宮。乾隆時燬於火。卽李斯碑也。

漢人重經術。丞相無文章。秦人棄詩書。籀法真老蒼。淋漓大筆鬼神守。啞碑猶與山爭壽。或云金繩玉檢藏其中。動之輒遇風雷通。或云漢代相如筆。元封立石煩人工。碧霞東廡舊殘刻。世間摹本傳無窮。蟲文鳥跡類太古。幾笑管人不識字。帝遣神丁下塵世。寶此千年萬年紙。

亂後見西湖

劫後樓臺景物新。蘇公真是再來身。東家舊事忘臣里。西子依然在水濱。白社送春兼送客。青山歸骨不歸人。臨安若遇餘杭姥。破壁題詩認舊因。

楊花

花落江南樹樹昏。杜鵑消息記前村。春雲撲帳疑無力。晴雪開簾尙有痕。蕩子天涯初落魄。女兒亭角乍離魂。浮生重結青萍社。湖水湖烟接寺門。

泥絮光陰百五過。玉簫聲裏又關河。定無弱態探宮石。但有閒情語鏡娥。吳苑祇今歸騎少。隋隄終古暮



鴉多。雪兒未解勞人意。猶唱當年白紵歌。

擬樂府

昔日飲君酒。君食羶脣妾食鯉。昔日登君堂。君折桃花妾摘李。驄馬怨不歸。秋風厭羅綺。鄰家有女附書還。言君已到吳趨里。吳女如花看不足。紅顏盡日笙歌裏。殘粧久未上高樓。零落芙蓉已如此。贈君九華玉匣之雕琴。七寶珊瑚之角枕。勸君歸來博歡喜。一夕投梭爲君起。

郎爲蜘蛛羅。妾作蜻蜓尾。但願絲相牽。不惜爲郎死。問歡來何遲。道逢巫山女。妾不信歡言。衣上無雲雨。

旅思苦不樂。乃上長安橋。長安橋頭多酒肆。輕裘肥馬非吾曹。忽然千騎萬騎出。故人道旁相見招。相公厚我強作解。上書枉被妻孥嘲。何況黃金已盡色不驕。窮陰海市魚龍高。

翠鈿斜覆青絲額。賭酒徵歌名第一。陌上爭迎油壁車。秦樓楚豔無顏色。入門問主人。主人箕踞坐。左彈箏。右擊鼓。前列華缸。後通鎖戶。昨爲席上茵。今如草頭露。勸君莫笑出門遲。再抱琵琶與君訴。

懷儂曲

神香夜杵兜羅屑。畫檻朝雲蛛網結。銀梳斜眼媚簾櫳。一點金缸光咽咽。霞雪千腰青鳳裙。城南章曲迎黛神。蟾蜍淚乾無滴處。七十二絃彈古春。窓錦妬寒風不掃。紅巾嬾子侵人早。廬江小吏車在門。花難

已報辛酉考。

雜感

先代鋤經姓字香。(高祖宦京師時。有鋤經圖。國朝名卿題遍。)梅橋竹里徑全荒。(先曾大父簡松公。與梁隴北夫庵兩先生以經史實問。余家住梅東高橋。梁居竹竿巷。有梅竹聯吟集。)傳家三影遺書盡。(先大父居揚州。有三影閣。藏書最富。)忍問龍泓舊草堂。(西湖有龍泓洞。幽秀殊絕。先大父有別業數椽。今已圯。)

吳下青箱憶故居。(先府君歿後。攜家住吳。書籍遭兵燹。)外家手蹟亦焚如。(應叔雅先生。爲外曾祖。著聞然室詩集。應氏無後。所藏書籍。俱歸先府君。)昔年杭厲多殘本。珍襲葩經辟蠹魚。(叔雅先生爲杭蕙浦之壻。蕙浦先生有毛詩古韻一卷。樊榭有毛詩草木補疏二卷。皆應氏所藏。未刊行于世者。)鑿鐫示訓記庭除。今日吳陵入祀初。(先府君於光緒十二年崇祀泰州名宦祠。)我比賓王心更愧。博昌父老未修書。(駱賓王答博昌父老書。載唐文。)勾漏丹砂骨未仙。(葛洪爲勾漏令。)天教宦人窮邊。乞居香雪他年志。(余昔游洞庭兩山。往來香雪海。有買田築宅之意。)恨少柴桑下溪田。

擬青青河畔草

河湟通絕域。只隔關山裏。馬前一尺塵。頓使春風起。青袍好顏色。人生行樂耳。山下逢故夫。采藤今已矣。回首路漫漫。傷哉隴頭水。

擬涉江采芙蓉

微波動天末。吹入孤舟小。西洲去已遠。北渚望彌悄。橫塘獨自歸。零露散秋草。今日芙蓉霜。明日鴛鴦老。爲語同心人。容顏須自保。

擬明月何皎皎

海上生瓊樓。瓊樓密如櫛。空床思所歡。徘徊不忍出。誰家貴游子。綺羅蕩終日。黃昏忽驚見。使我百憂集。誰知夜夜心。愁滿鏡中色。賤妾將何爲。秋衾闕瑤室。

擬迢迢牽牛星

東南孔雀飛。西北牽牛望。牽牛渺何許。獨宿愁空房。空房在咫尺。咫尺參與商。喚起夜飛鵲。欲渡河無梁。歡會終有期。天上無歲光。浮雲沒斜漢。良人去遠方。耿耿不成寐。涕泣縫衣裳。盼君驄馬來。堂上調絲簧。

題宋高宗劉夫人畫織圖

青衣北狩變爲狗。銅駝陌上無人走。五國城荒搗練寒。徽宗有搗練圖。金章宗印。內家閒却纈盆手。

樓璿圖呈蘭館風。龍綉夜織春機紅。黃門宣語值璘藉。桑本都標德壽宮。尙衣夫人最才敏。簪花手寫新圖進。澄心紙拂麝煤香。名字親鈐紅沫印。羊車侍宴忘朝旦。親課紅蠶勞玉腕。油壁愁看上苑花。官奴猶進嚴州炭。此圖出自奉華堂。想見拈毫粉爪長。園寢已荒香骨朽。丹青猶自說昭陽。夫人畫筆擅神異。補袞曾描奉宸地。更有宮衣添綫圖。命名自識賢妃意。絹素流芳七百年。趙家粉本重嬋娟。王孫讚語猶嫌僞。馬遠殘山莫浪傳。

題蓉泚寄劍草後

故鄉鷗侶訂詩盟。曾共江湖載酒行。拋却綺游來渤海。要將健筆洗幽并。喜談風格真宗子。垂老年華畏後生。異日遍交河朔士。參軍蠻府借才名。

寶劍篇

魚腸爛熳土花蝕。鬼母哀啼老龍泣。猿公手擊要離精。天地無聲皆失色。六丁攝匣匣已空。黃金聲價爭雌雄。三峽動搖神女下。口中夜夜吞長虹。拔鞘起舞白日匿。一片模糊賊臣血。帝遣風胡重拂拭。紅吐千山霹靂舌。

常山弔趙順平侯

百戰河山警斗刁。西川銅柱建孤標。棧雲揮手扶炎漢。恆岳傷心入僞朝。陣馬神來滹水暗。蜀鵑魂斷故

鄉招。樓桑村落成蒿里。一代君臣墓草凋。

趙陵鋪弔南粵王

身辭黃屋釋雄猜。陸賈乘軺帝詔來。先代表冠新漢臘。少年耕釣舊秦灰。千秋湯沐餘坏土。百粵山川冷夜臺。防護尙煩諸父老。王孫麥飯有誰哀。

元遺山有鹿泉新居詩。求其趾不得。

蓬蒿已沒詩人宅。野史亭荒起暮煙。庾信園居容小隱。邢原身世最堪憐。文章憔悴南冠錄。河朔倉皇北渡年。千載吟魂應太息。草堂不與浣花傳。

井陘道中

壑轉陰雷碎馬蹄。行人都向太行西。至今危坂艱方軌。如此雄關吝井泥。陶穴未忘唐俗儉。石田平俯代雲低。悲歌尙有橫汾客。腐史填胸壁上題。（微水鋪店壁。有弔淮陰絕句。山右人作。）

感事

鳳凰城上隱悲笳。戰鼓無聲落日斜。遼海極天聞鶴唳。將星墮地化蟲沙。深防松杏通秦蹕。忍見蒲桃絕漢家。太息深宮思道濟。一燈秋雨夢京華。

布颿無恙狎沙鷗。身世渾如不繫舟。北去蕭綜愁葉落。南來符朗慨江流。鈞天霓羽開宮宴。環海戈鋌警

敵樓。寄語從征諸壯士。捷書早報玉階頭。

贈家蓉沚

中郎始可作。焚爾嶧陽桐。唾地人爭棄。談天客盡窮。蒙君開饅席。憐我尙飄蓬。相約荆高里。豪歌一曲中。

右尊鄉詩鈔一卷。錢唐張沚尊先生所著。余從其嗣君孟劬處錄副者也。先生有吳溫煙語詞一卷。已刊行。其事蹟詳兩浙詞人小傳。詩格在漁洋竹垞之間。而不墮嘉道以來性靈惡派。久官畿輔。晚年挂冠僑吳中。與王半塘鄭叔問朱古微諸先生以詞相唱和。生平於詩不自留稿。故身後所存者僅此。自項中履板蕩。故家遺籍。半委灰燼。及今不爲搜香。恐將有玄陸俱沉之歎。爰爲商諸孟劬。先登本誌。以廣其傳。聞先生尙有駢體文數十篇。容異日訪得。再行次第刊布云。甲申秋日。萬載龍沐勛附識。

## 同聲月刊徵稿簡約

- 一 本刊除特約撰述外并歡迎各方投稿
- 二 來稿須直行繕寫并加句讀
- 三 本刊對來稿有權刪改其不願刪改者須預先聲明
- 四 來稿除樂譜論著譯述遺著等欄經預先聲明者外無論掲載與否概不退還
- 五 來稿須註明真實姓名及詳細通訊地址發表時署名任便
- 六 來稿請寄南京漢口路十九號同聲月刊社收

同聲月刊 第四卷 第一號

（民國三十三年七月十五日出版）

編輯者兼 發行 同聲月刊社

南京漢口路十九號

印刷者 新申印刷公司

南京朱雀路遊藝井十四號

代售處 商務印書館

上海河南路棋盤街

作者 書社

上海福州路二七一號

（本期售價國幣六十元）

# 中央儲備銀行



資本總額國幣壹萬萬圓

中華民國國家銀行

南京

總行

行址：中山東路一號

電報掛號：中文五五四四  
英文 CENALBANK (各地一律)

電話：二二二一〇  
二二五四一  
二二五五八

上海行址：外灘十五號

電報掛號：中文八六二八

分行電話

七四六三  
七四六四  
七四六五  
七四六六  
(轉接各部)

△本行特權

一、發行本位幣及輔幣兌換券

二、經理國庫

三、承募內外債並經理其還本付息事宜

△本行業務

一、經理國營事業金錢之收付

二、代理全國銀行準備金之收付

三、代理地方公庫及政府存款或發行或保證

四、代理政府發行或保證之國庫券及公債

五、代理重現及承兌票國內商業匯票及期票之重貼現

六、代理國內外支付之匯票買賣國內外股實銀行

九、之即期匯票支票或買賣國民政府發行或保證之公債庫券

十、買賣生金銀及外國貨幣

十一、辦理國內外匯兌及發行本票

十二、以生金銀為抵押之放款

十三、以國民政府發行或保證之公債庫券為抵押之放款

十四、代理政府委辦之信託業務

十五、代理收付各種款項

蘇州支行 行址：觀前街

杭州支行 行址：太平坊

蚌埠支行 行址：二馬路

甯波支行 行址：江廈路

廣州支行 行址：長堤大馬路

無湖辦事處

常熟辦事處

無錫辦事處

南通辦事處

揚州辦事處

行址：中二街

行址：老縣場

行址：北門大街

行址：西大街

行址：左衛街

太倉辦事處

鎮江辦事處

嘉興辦事處

常州辦事處

泰縣辦事處

城內稅務橋

寶塔街

望吳橋

西瀛里

彩衣街